



尺数通志

ル 5
1575
15



1575
16



重修安徽通志卷四十九

輿地志

古蹟六

廬州府

合肥故城在今縣北漢置漢書地理志九江郡合肥注應劭曰
 夏水出父城東南北至此與淮合故曰合肥通鑑地理通釋淮
 水與肥水合故曰合肥輿地紀勝漢獻帝時曹操表劉馥為揚
 州刺史單馬造合肥空城梁書武帝紀天監五年豫州刺史韋
 叡克合肥城普通七年合肥改為南豫州太清元年詔改合肥
 為合州又韋叡傳天監四年遷豫州於合肥隋書地理志合肥
 後齊分置北陳郡開皇初郡廢寰宇記合肥故城在今縣北宋
 曹明之記曰合肥入斗度獨多故號金斗城亦曰金斗門元至

重修安徽通志 卷四十九 輿地志 古蹟 廬州府

正二十四年明師克廬州立江淮行省於此府志今雞鳴山下有新城故址

逡遁故城在合肥東北漢縣也屬九江郡後漢因之晉屬淮南郡宋省宋書州郡志逡遁後分蕪湖為境舊唐書地理志慎漢逡遁縣屬九江郡古城在今縣南水經注洛水上承施水於合肥縣北流逡遁縣西寰宇記逡遁故城在慎縣南二十五里魏武伐吳嘗修此城以屯守呼曰曹城府志今其地名清水橋慎縣故城在合肥縣東北劉宋時僑置宋書州郡志南汝陰郡領縣慎魏書地形志南梁郡領縣二慎南高隋書地理志廬江郡慎東魏置平梁郡陳曰梁郡開皇初郡廢屬九江郡路史國名紀吳伐慎白公敗之今廬之屬縣西北四十一里有故慎城慎水寰宇記慎縣在州東北七十里本漢逡遁縣地紹興三十

二年避諱改曰梁縣從舊郡名也元因之明初省入合肥今為

梁縣鎮名勝志宏治初店埠民修橋掘得小石碣上鐫慎縣界

三字背刻少避長賤避費六字舊按古慎城在縣北路史以為春秋哀二十六年吳人伐慎白

公敗之即此故左傳杜注慎在汝陰今為潁上縣此當別是一城非春秋之慎也今按寰宇記晉改逡遁縣置

新城在合肥縣西北三國魏志青龍元年揚州都督滿寵以城

臨江湖賊得據水為勢請立城西北三十里依險可固守謂之

新城故吳志云大帝頻征合肥新城是也晉為淮南廬江二郡

地東晉亦為重鎮又寰宇記有界樓故城一名金斗城在合肥

縣西北五十里隋開皇五年立鎮置倉在廬壽二州界蓋即新

城也宋乾道新城記今城西北有白渡港魏築二壘於此號曰

合肥城

赭縣在合肥縣西北唐光啟二年壽州刺史張翱遣兵寇廬州

楊行密將田頵等敗之於赭城是也

滁陽城在合肥縣東北竄宇記慎縣古滁陽城在縣東北六十
四里吳赤烏十三年孫權遣兵斷滁作堰以淹北道遂築此城
爲守禦東晉置南梁郡隋開皇三年廢

小峴城在合肥縣東七十里梁書韋叡傳遣梁郡太守馮道根
攻魏小峴城中宿而城拔遂進討合肥陳書黃法蕤傳齊遣歷
陽王步騎五萬來援於小峴築城

斗梁城在合肥縣輿地紀勝宋乾道五年郭振築新城號斗梁
橫舊城之半而阻絕舊城於斗梁之外

烏珠上城在合肥縣北五里府志宋紹興辛巳金人南侵陷廬
時築

桃花城在合肥縣南二十五里輿地紀勝在城南四十里命名

建置皆無考

舒縣故城在廬江縣西春秋時舒國僖公三年徐人取舒杜注
舒國今廬江舒縣秦爲舒邑漢文帝十六年封淮南厲王子賜
爲廬江王都舒後漢建武四年馬成圍李憲於舒三國時吳廬
江治皖魏廬江治六安而舒縣廢晉仍置舒縣齊仍爲廬江郡
治永明四年冠軍長史沈憲請以廬江屬西豫州七年豫州別
駕殷彌仍請還屬南豫州章懷太子曰舒縣故城在今廬江縣
西竄宇記廬江縣本漢龍舒縣故城在今縣西一百二十里梁
武帝置廬江縣義甯元年移於石梁東南景龍二年移於今所
縣志今縣西南三十里有大城縣西北金牛山下有金牛城蓋
古舒縣遺跡也

梁王城魯王城輿地紀勝梁王城在梁縣東六十里魯王城在

梁縣東七十里

按寧字記東晉於慎縣置南梁宋紹興間改慎縣曰梁縣

古梁縣城輿地紀勝古梁縣城在梁縣治東八里即古平梁郡

慕容城在廬江縣東二十里相傳慕容垂屯兵所築

龍舒城即舒城縣治左傳文公十二年羣舒叛楚成公十七年

楚滅舒庸襄公二十五年楚屈建帥師滅舒鳩漢置龍舒縣應

劭曰龍舒即羣舒之邑杜預曰羣舒偃姓舒庸舒鳩之屬今廬

江南有舒城舒城西南有龍舒城是也又云平舒君名宗巢二

國羣舒之屬正義曰世本舒姓舒庸舒鳩舒龍舒鮑舒龔

以其非一故言屬以包之後漢永平元年封楚王英舅子許昌

為龍舒侯東晉末縣廢唐開元中復於此置舒城縣路史國名

紀今廬之舒城也一作羣舒寔字記古舒鳩城在舒城縣內舒

鮑城在縣西一百里龍舒水南龍舒城在縣西一百里龍舒水

西又有舒庸城與舒鳩城俱在縣治內

羹頡城在舒城縣西北三十里史記漢高帝封兄子信為羹頡

侯食邑於此輿地紀勝舒城縣漕贖堰即漢羹頡侯所築有羹

頡廟劉邠為之記名勝志羹頡侯城在縣西北三十里有墓在

焉

荒浦離城今舒城縣境左傳襄公二十四年舒鳩人叛楚楚子

師於荒浦杜注荒浦舒鳩地又襄公二十五年舒鳩人卒叛楚

令尹子木伐之及離城杜注離城舒鳩城路史國名紀今廬州

舒城也離城荒浦鳩茲皆其地鳩茲今為蕪湖縣

高陽城在舒城縣西南二十里名勝志相傳高陽氏封其子庭

堅於舒蓼之間故名

亞夫城在舒城縣東南十五里相傳周亞夫嘗領兵至此築東

西二城其址尚存或又謂亞父范增築

黥布城在舒城縣東晉孝武帝時於黥布城置南新蔡郡屬南豫州尋廢

周瑜城在舒城縣西十八里相傳瑜從孫策舉義徙家於舒因築今爲牧馬市鎮或云卽淨梵寺

霍湖城在舒城縣南五里土人築以避兵又花家城圍基城俱在縣西十里又羊家城繆家城俱在縣西十五里陽石城在縣北三十五里皆南北朝及南宋初戍守之所

茆城在舒城縣東南十五里名勝志相傳曹操屯兵所築築時以茆掩之詐敵兵故名

襄安故城在無爲州南四十里漢置縣劉宋時省隋改蘄縣爲襄安在今巢縣北元豐九域志無爲有襄安鎮卽漢故縣也名

勝志無爲州襄安廢縣今爲襄安鄉

臨湖故城在無爲州西南漢縣也後漢廢樂成靖王子萇改封爲臨湖侯國於此宋廢名勝志漢臨湖縣在州東南六十里瀋須潛水之交州志臨湖廢縣在州南八十里臨璧山下今爲臨湖圩

居巢故城在巢縣東北五里水經注居巢縣古巢國也湯伐桀桀奔南巢卽巢澤也周爲巢伯國周武王時巢伯來朝芮伯作旅巢命春秋文公十二年楚人圍巢昭公二十四年吳滅巢史記楚平王十年太子建母在居巢秦爲居巢縣亦曰居鄭項羽紀范增居鄭人後漢永平元年明帝更封菑邱侯劉般爲居巢侯國建安二十二年曹操軍居巢吳周瑜爲居巢長後以吳魏戰爭地遂廢晉平吳後復立居巢縣東晉後廢寧宇記古居巢

城陷為巢湖又舊志有桀王城在巢縣卧牛山北今為紫微觀
新附城在無為州南十五里名勝志吳諸葛恪築以居新附之
人因名今為新附橋其地有諸葛廟即祀恪者

橐皋故城在巢縣西北春秋時吳邑哀公十二年公會吳于橐
皋漢置橐皋縣屬九江郡孟康注曰橐皋音拓姑後漢省三國

吳志朱桓傳黃武元年曹仁遣其子泰攻濡須城自將萬人留
橐皋括地志在巢縣西北五十六里地理今釋作東北六十里

十一年烏珠陷廬州屯拓皋為劉錡所敗舊說橐拓音近而訛
後人因拓類拓又訛今按釋文注橐音章夜反是橐本有拓音
也今名拓皋鎮其東
又有會吳城故址

蕲縣故城今巢縣治漢蕲縣在今宿州界晉太元中僑置南譙
郡治山桑縣又置蕲縣屬焉隋改蕲為襄安縣又改襄安為巢
縣水經注柵導巢湖又東逕南譙僑郡城南舊志有譙郡城在

縣東南二十里今為南譙鄉

九江廢郡在無為州襄安鎮秦漢以前江徭城下為舟車要衝

潁州廢郡在巢縣東南劉宋僑置屬南豫州南齊初屬豫州後
省水經注寶湖水東出為後塘塘上有潁川僑郡故城

無為廢縣在今無為州宋縣也寰宇記無為軍本廬州巢縣之
無為鎮曹操征孫權築城於此攻吳無功因號為無為城臨濡

須水上塢尋為無為監為江淮要津宋熙甯三年析巢廬江二
縣地置無為縣明初省縣入州州志舊無為縣本唐巢縣之城

口鎮故址今在州西三里花家疇

扶陽廢縣在無為州西北接巢縣界晉太元中僑置屬南譙郡
宋齊因之後省唐武德三年復置屬巢州七年廢

開城廢縣在無為州西唐武德三年置屬巢州七年廢

為開城鎮在州西四十里

東關在巢縣東南濡須水所經也三國吳志諸葛恪傳恪以建興元年會眾於東興更作大隄左右結山峽築兩城魏書任城王澄傳梁頻斷東關欲令巢湖泛溢湖周圍四百餘里東關合江之際廣不過數十步詔委澄經略澄以東關水衝大峴險要東關縱水陽石合肥有急懸之勢於是遣傅豎眼等進次大峴東關力山淮陵皆分部諸將倍道據之陳書任忠傳太建五年忠擊走齊歷陽王高景安於大峴逐北至於東關仍克其東西二城水經注湖水又東逕右塘穴北為中塘塘在四水中水出格虎山北山上有虎山城有郭僧坎城城北有趙祖悅城並故東關城也昔諸葛恪帥師作東興隄以遏巢湖傍山築城塘即東興隄城亦關城也唐書地理志巢縣東南四十里有故東關

通鑑地理通釋東關東南有石渠鑿山通水故名關口相傳夏禹所築一號東興今其地高峻險狹實守扼之所方輿勝覽濡須山謂之東關七寶山謂之西關胡三省通鑑注東關即濡須口亦謂之柵江口在兩山間濡須山在和州界為東關七寶山在無為軍界為西關兩山相對中為石梁吳築隄在東關南岸魏置柵在西關北岸縣志有三關屯即東關也關當三面之險巢駕釐虺左傳成公十七年楚人圍巢伐駕圍釐虺杜注巢駕釐虺楚四邑春秋大事表駕釐在無為州境虺在廬江縣境

考實俱在廬州府境

庸浦春秋襄公十三年吳伐楚戰于庸浦杜注庸浦楚地春秋大事表庸浦今無為州南濱江之浦

鵲岸在舒城縣西左傳昭公五年楚伐吳吳人敗諸鵲岸杜注

即廬江舒縣之鵲尾渚亦曰鵲亭按鵲尾渚屢見南北史要屬臨江之地當在無為境內與地紀勝謂在舒城縣恐未確

鎮淮樓在府石城北門宋郭振拓城基改為譙樓明嘉靖間郡守龍誥重建有銅壺以核晝夜時刻又府治後有葵廳亦振建五鳳樓在府東城上輿地紀勝唐天祐中張崇築城創樓落成之日有五色鳥集其上因以紀瑞縣志即今威武門城樓

九華樓在無為州移風門上一名南樓宋米芾建江之南九華諸峯屹然相向因以為名

稻孫樓在無為州大安門上宋米芾秋日登樓燕集見田禾已穫復青問諸老農曰稻孫也芾喜而名其樓

明遠樓在無為州楚澤門上與羣山相接下臨諸湖米芾題額講書樓在無為州城隍廟前宋謝枋得寓於州州人建此樓居

之

聖文祕奉閣在府城宋劉筠知廬州構閣藏真宗飛白書及所賜書顏曰聖文祕奉之閣

五雲閣在無為州城內宋五雲叟陳朋所建

聚山閣在無為州治宋米芾建

威遠亭在府西城上明熊文舉禦寇駐此又作稅子亭於東郊外

景賢亭在府治名勝志明宏治中於馬亮故宅得晏殊包拯諸公詩刻石登壁間因建此亭

衣錦亭在府治東輿地紀勝宋天禧五年馬亮歸守鄉郡因創此亭

挹秀亭在無為州學宮後宋滿維端有詩又四望亭在州治亦

滿維端所築有詩

仙隱亭在廬江縣水簾洞上名勝志昔左慈棄竹杖於此今竹生皆下曲宋隆興初建亭以表其迹

古陵亭在廬江縣境一作虔亭寰宇記搜神記云龍舒陵亭有樹高數十丈時久旱長老因以酒脯往祭有寡婦李憲於光中見衣繡女曰我樹神也朝來祈雨吾已求之帝日中當雨至時果驗遂爲立祠歲餘神辭去畱一玉環與寡婦曰持此可以避禍後袁術劉表相攻龍舒民皆流散此里獨全隋書麥鐵杖傳楊素遣鐵杖夜浮渡江覘消息爲賊所擒行至虔亭鐵杖取賊刀亂斬衛者以歸

飛霞亭在舒城縣署輿地紀勝在縣東城上宋李公寅讀書處下有清心池其兄伯時爲畫舊宅圖蘇軾有詩

教弩臺在府城東門內九獅橋北方輿勝覽曹操所築教強弩以禦吳之舟師今爲明教寺

明遠堂在府東北七十里梁縣鄉迴環皆水中有一洲方輿勝覽宋鮑照嘗讀書於此縣志宋張持正卽其地建俊逸亭

義門臺在府西十八里唐萬敬儒三世同居親亡廬墓宣宗大中閒特表其門後人因以名臺

節婦臺在府城內惠政橋東南宋包拯舊第節婦拯豕嗣總妻崔氏縣志今名尙節樓在鎮淮樓西南

釣魚臺在無爲州東北舊傳浮邱伯釣魚之所又一在廬江縣東南八里石磯枕河相傳左慈釣魚處

漕臺在無爲州城內舊軍學西宋時設漕運司以轉江襄漕事避暑臺在廬江縣東北隅舊傳曹操攻吳避暑休兵於此今爲

城隍廟

孔臺在巢縣西臺皋鎮狀如圓壇可容千人名勝志世傳孔子南游至橐皋與弟子憩臺而返

懸魚堂在府治內名勝志漢羊續爲廬江太守有饋生魚者意難卻之乃曝爲乾魚懸於壁上他日復饋續乃出所懸魚示之其人慙懼而退後人爲建懸魚堂

三至堂在府治西宋陳堯佐三守是邦故以名堂葉祖洽有記西巖書堂在府東巢湖西岸宋安淮有記

萬卷堂在無爲州天慶觀西宋祥符中李景仙藏書於此多祕閣所無者以其半進於朝

仰高堂在無爲州治東方輿勝覽宋米芾建自撰記三桂堂在無爲州宋王之道與兄之義之深同科故名其堂曰

三桂

馬亮故宅在府城和平橋東明改爲下察院

包拯故宅在府鳳皇橋巷

余闕故宅卽今合肥縣治明洪武中建恩柱坊尙存

歸來宅在舒城縣治東宋李公麟歸隱處

亞父故居在巢縣東北二十里亞父山皇覽云吏民祭亞父於

居巢庭上長吏初視事必祭而後從政庭中又有亞父井

迴瀾軒在府南門外香花墩有包孝肅拯祠軒蓋爲公設也

寶晉齋在無爲州治東北宋州守米芾建以晉人法書碑刻嵌

壁間因名今爲米公祠

青陽山房在府城東六十里巢湖北元余闕讀書處

環翠山房在府城南湖右永樂港之原元葛聞孫隱居講學之

所縣志今鳳皇墩卽其舊址

同食館在府南城上輿地紀勝唐元和中刺史路應求建引左

傳楚人出師自廬以往賑廩同食因以爲名後又改名建德館

陳鴻韓愈皆有記按路應爲路嗣恭之子韓愈曾爲之作神道碑新書附其傳於其父嗣恭後但名應廬州

府志誤作應求韓亦未有同食館記也

崇明館在廬江舊縣治南數十步宋謝惟士知縣事省以拓縣

治見碑記後爲儒學

璇源館在舒城縣東七里宋元符中李公麟建自爲記

國朝咸豐三年侍郎呂賢基徐啟山殉節於此

吳王宮在廬江縣城內紫芝坊名勝志相傳五代楊行密故宅

今爲金剛寺

蒙古學在無爲州今儒學西北大街

歐冶子鑄劍處在廬江縣東北二十里冶父山今爲寺

毛義隱處在廬江縣東北七十里毛公山有讀書洞

梅子真隱處在舒城縣西七十里梅山漢梅福棄官隱此地

八公飛昇處在巢縣西橐皋鄉八公山列仙傳云八公白日上升遺藥在器雞犬皆得仙

花園在府城南二十里元至正間宣讓王遊賞之所其址尙存

縣志王名特穆爾布哈元天曆初改封宣讓王移鎮廬州

文翁里在舒城縣南九十里輿地紀勝漢文翁嘗讀書於此

濡須塢在無爲州東北五十里接巢湖通志和州歷陽縣西北

一百八十里有濡須水漢建安十七年孫權築塢於此以拒曹

操寰宇記濡須塢在巢縣東南二百八十里

偃月塢在巢縣東南三國吳志呂蒙傳蒙從孫權拒曹操於濡

須勸權夾水口立隴寔宇記偃月鳴在巢縣東南二百八十里

濡須水口形如偃月故名按偃月鳴即濡須鳴

箏笛浦在府城后土廟側寔宇記合肥縣有箏笛浦續搜神記

浦中昔有大舶覆水內漁人宿於旁夜聞箏笛之聲相傳曹操

載妓覆船於此

藏舟浦在府城內古金斗門外寔宇記合肥縣藏舟浦即魏將

張遼襲吳藏戰艦處縣志在今城內淺壩

春秋山莊在舒城縣南春秋山宋李公麟讀書處公麟有春秋

山莊四時樂詞又有洗硯池亦公麟遺蹟

姚萇村在巢縣東北新安鄉青龍山陽山橫山之間四山環合

中為原田相傳東晉時姚萇駐師屯田於此

回車街在巢縣西北五十里小佛嶺兩山夾峙中通一綫自嶺

徑橐皋過鍾離徐沛達魯境舊為南北大道俗傳孔子於此回車

鑊里在巢縣西北濱焦湖吳太平二年孫琳拒諸葛誕於壽春

大發兵出屯鑊里帝亮責琳畱湖中不上屯一步者是也

飛騎橋在合肥城東門內舊名西津橋一名逍遙橋三國吳志

孫權為魏張遼所襲乘馬越渡處水經注合肥城東有逍遙津

水上舊有梁即此

嗟虞墩在府東北八十里世傳項羽於此別虞姬

香花墩在府城南濠水中蒲葦數里魚鳧上下長橋徑度竹樹

陰翳舊為包拯讀書處

麾旗墩在舒城縣南十五里世傳漢壽亭侯駐兵於此

舒王墩在舒城縣北四十里舊傳漢龔頡侯築此侯封於舒故

謂舒王墩

金雞墩在舒城縣西一里下有金雞潭明秦民悅建書院於此
劉郎寨在廬江縣牛欄山自麓至走馬嶺上凡十數里寨陞寬
平可容萬眾險要可守

金華寨在廬江縣黃屯山上勢最險要

安樂柵在無爲州東北梁太清末合州刺史鄱陽王範屯於濡
須遣世子嗣將兵守安樂柵明年嗣破侯景將任約於三章遂
徙鎮焉亦謂之安樂寨通鑑胡三省注三章在濡須之東
煉丹池在府城東四頂山上漢人魏伯陽煉丹之所故址尙存
墨池在無爲州治宋米芾知無爲軍時郡廳後構小亭爲遊憩
之所亭前登石池夜坐苦蛙聒耳取視投諸池蛙鳴遂絕翼日
池水盡墨色因書墨池二字今石刻尙存

偃月池在無爲州治南每中秋夜月偃半輪故名

洗耳池在巢縣教場西相傳許由洗耳處

狀元井在府學內宋郡人馬亮擢進士第一故名

左慈井在廬江縣治南相傳魏左慈嘗置丹一粒於井宋政和
閒每清夜氣肅輒紅光燭天

瑠璃井在巢縣城北中有四柱色如瑠璃

笑泉在巢縣南七十里聞人笑聲則泉涌沸故名

浮邱釣石在巢縣濡須口水濱一大石宋人鐫浮邱釣石四字
於上

隋碑在巢縣紫微觀開皇十四年造今可見者只十數字

重刊安海通志卷五十一
陷沒移徐州於此蕭齊建武二年魏拓拔珽攻鍾離梁太清三年北徐州刺史蕭正表以鍾離降魏改置楚州陳大建五年魯廣達克北徐州卽以廣達爲北徐州刺史仍梁舊名也隋唐爲濠州治括地志鍾離故城在今縣東北五里通鑑地理通釋鍾離有東西二城濠水流於其中水經注淮水又東北濠水注之又東過鍾離縣北寧宇記洛水自定遠縣流入鍾離縣與壽春縣分中流爲界縣志舊州城在今縣西三里一名三牛城以郡治有三石牛也郡介濠淮多水災牛土畜故以鎮之明初以鳳陽爲新城臨淮爲舊城

國朝乾隆十九年省臨淮併入鳳陽縣遂廢
漢下相故城在廢臨淮縣西北
公路城在廢臨淮縣舊城東相傳袁術據淮南時所築

樂平廢城在廢臨淮縣東南本漢縣屬東郡劉宋時僑置於此宋書州郡志鍾離太守樂平合蕭齊永明元年割屬濟陰郡後魏屬濟陽郡齊周時廢縣志縣東南六十里有香城亦名東鄉城疑其遺址

趙草城在廢臨淮縣東北梁書曹景宗傳魏將楊大眼對橋北岸立城每牧人過岸伐芻藁皆爲大眼所略景宗乃募勇敢士千餘人徑渡大眼城南數里築壘壘成使別將趙草守之因名縣志城距邵陽洲數里據淮爲險

小東城在廢臨淮縣東通典鍾離縣東一里有小東城寧宇記城在東北三里宋泰始二年築以鎮濠口陳太建五年廢地理通釋云秦始皇築當是泰始之訛

當塗故城在懷遠縣西南

年封魏不害爲當塗侯國屬九江郡漢志注應劭曰禹所娶塗山侯國也有禹墟三國時縣廢晉太康元年復置成帝時淮南民多南渡江乃僑立當塗縣於江南而故縣廢爲馬頭城升平三年豫州刺史謝萬遣劉建修治馬頭城水經注淮水自莫邪山東北逕馬頭城北魏馬頭郡治卽當塗故城也隋書志鍾離郡塗山後齊改曰馬頭置郡曰荆山開皇初郡廢改縣曰塗山唐書地理志鍾離武德七年省塗山縣入馬縣志馬頭故城在淮水濱舊以爲卽馬頭集非

平阿故城在懷遠縣西南戰國時齊邑漢成帝河平二年封王譚爲平阿侯國屬沛郡後漢建武十二年更封耿章爲平阿侯後爲縣屬九江郡晉屬淮南郡東晉後廢水經注淮水北合沙水淮西岸有平阿故城縣志有平阿集在縣西南六十里平阿

山下俗譌爲平峩又考魏志譙州高塘郡有平阿縣在今天長縣及高郵州界蓋南北朝僑置非故城也

龍亢故城在懷遠縣西漢置龍亢縣屬沛郡元鼎五年封樛廣德爲侯邑後漢屬沛國晉改屬譙郡東晉後廢梁普通六年趙景悅拔魏龍亢城因置龍亢郡魏書地形志譙州有龍亢郡梁武置仍領龍亢縣武定六年置是也隋開皇初郡縣俱廢唐武德四年析夏邱縣地復置貞觀八年省水經注沙水自山桑東南過龍亢縣南縣志龍亢城在縣西北七十五里今爲龍亢集義成故城在懷遠縣東北漢竟甯元年封甘延壽爲義成侯國屬沛郡後漢改屬九江郡晉屬淮南郡東晉後省魏書地形志復有義成縣屬仁州臨淮郡齊併入穀陽縣水經注沙水又東北過義成縣西南入於淮義成世謂之楮城其城當渦水入淮

處亦名渦口元和郡縣志貞元後濠州西渦口對岸置兩城縣志有拖城在縣東北十五里即古渦口城亦即義城縣矣明統志在縣西北四十里誤

荆山故城在懷遠縣北後魏延昌四年以梁堰淮水命楊大眼鎮荆山築城置戍梁普通五年北兗州刺史趙景悅圍魏荆山拔之隋書地理志塗山舊曰當塗後齊改曰馬頭置荆山郡開皇初廢元豐九域志蘄縣有荆山鎮寶祐五年賈似道奏以渦口上環荆山下連淮岸險要可據於此置懷遠軍兼置荆山縣元改軍為縣省荆山縣入焉舊志荆山城在縣北三里亦謂之舊城

向城在懷遠縣西北四十里渦水之陽春秋隱公二年莒人入向杜注譙國龍亢縣東南有向城漢置向縣水經注北淝水又

東南至向縣故城南又縣北二十五里有圍城舊說謂之向城非

考城在懷遠縣南五十里本漢陳畱郡屬縣江左僑置於此沈約宋志盱眙郡有考城縣蕭齊因之魏廢縣志今為考城鋪邊軍城在懷遠縣西八里宋末江淮安撫使夏貴所築

新城在懷遠縣南五十里梁置馬頭郡大通元年刺史劉公茂築新城北齊改為馬頭縣隋初廢

曲陽故城在懷遠縣洛河之南漢河平二年封王根為曲陽侯國屬九江郡地理志注應劭曰在淮曲之陽故名後漢曰西曲陽以下邳有曲陽故加西也晉後省魏書地形志彭沛二郡治南陽縣有曲陽城隋志定遠縣有舊九江郡後齊廢為曲陽縣後周又廢曲陽入定遠縣水經注洛水又北逕西曲陽故城東

淮水右納洛川於西曲陽縣北寔宇記廢西曲陽縣在壽春縣
東北八十三里南臨洛水又曰在定遠縣西北九十五里又曰
梁克壽春後立北譙郡於故曲陽縣北譙蒙二縣屬焉
東城故城在定遠縣東南秦置縣二世二年陳勝將葛嬰至東
城立襄疆爲楚王漢高帝五年項羽兵敗自陰陵引而東至東
城有二十八騎文帝八年封淮南厲王子良爲侯邑地理志屬
九江郡後漢屬下邳郡建康末陰陵人徐鳳反攻燒東城晉屬
淮南國東晉後縣廢水經注池水出東城縣東北流逕東城縣
故城南括地志東城故城在今縣東南五十里寔宇記梁天監
三年土人蔡豐據東城自魏歸梁武帝嘉之改曰豐城立爲定
遠郡又改爲廣安郡定遠縣隋開皇三年廢郡畱縣大業十一
年縣廢唐武德二年於廢廣安郡置定遠縣天寶四年移於今

治

陰陵故城在定遠縣西北故秦縣漢書項籍傳籍渡淮至陰陵
迷失道地理志九江郡陰陵後漢爲九江郡治晉屬淮南郡東
晉後縣廢水經注莫邪山南有陰陵縣故城濠水出陰陵縣之
陽北亭括地志在濠州定遠縣西北六十五里縣志城周二里
故址猶存

芟蒲城在定遠縣西南亦名定遠廢城寔宇記在縣西南八十
五里相傳梁魏交爭之曰魏築爲壘在芟蒲塘下因塘得名梁
普通七年胡龍牙掠芟蒲城卽此
閻城在定遠縣西北寔宇記在縣西北一百十五里相傳魏太
武南侵時所築梁普通三年於此置西沛郡大寶二年廢
柴王城在定遠縣東北七十里大橫山上或謂周顯德時南征

屯兵處

壽春故城即今壽州治本楚邑秦置縣史記楚考烈王自陳徙都壽春名曰郢秦於此置縣漢五年劉賈南渡淮圖壽春十一年立子長為淮南王都壽春元狩初為九江郡治後漢屬九江郡晉屬淮南郡孝武時避諱改曰壽陽義熙十三年豫州刺史劉義慶鎮壽陽元熙元年劉裕自鎮壽陽宋為豫州治所蕭齊永元二年豫州刺史裴叔業以壽陽降魏魏改置揚州仍改縣曰壽春梁普通七年淮堰水盛壽陽城幾沒乃遣夏侯亶等攻之壽陽降復以為南豫州太清三年侯景將王顯貴以壽陽降東魏復曰揚州陳太建五年吳明徹伐齊克壽陽復曰豫州隋開皇八年將伐陳置淮南行省於壽陽平陳始改曰壽州五代周顯德二年伐南唐克壽州移州治下蔡壽春縣屬焉寰宇記

壽春縣在州南二十五里有壽春故縣在縣西一里又有諸葛誕城在縣東一里又有廢西壽春縣在縣西四十里輿地記壽陽城中有二城一曰相國城宋武帝伐長安時築水經注芍陂瀆北流入壽春城中又北逕相國城東一曰金城壽陽中城也陳書吳明徹攻齊齊兵退據相國城及金城舊志宋紹興二年金人陷壽春六年楊沂中等敗劉猷於藕塘追至南壽春進攻壽春不克還城南壽春即此

安豐故城在壽州南漢安豐縣在今河南固始縣界東晉始僑置於此隋志梁置陳畱安豐二郡開皇初郡並廢以縣屬淮南郡唐屬壽州水經注淝水西北逕安豐縣故城西寰宇記縣在壽州南八十里又廢安城府在縣南四里隋開皇十六年於白雀驛置舊志宋紹興十二年升為安豐軍三十二年改軍為壽

春府乾道三年移安豐軍於壽春縣以安豐縣屬焉元屬安豐
路明初省入今爲安豐鄉故城在州西南六十里西去霍邱縣
九十里

梁城在壽州東北梁書呂僧珍傳天監五年命僧珍率羽林勁
勇出梁城水經注淮水東逕八公山北又東逕梁城通鑑注晉
僑立梁郡於壽春界故有梁城其城在壽陽東北鍾離西南州
志東去洛川口二十五里

魏昌城在壽州北魏書李崇傳延昌初梁作淮堰揚州水漲刺
史李崇乃於八公山之東南更起一城以備大水州人號曰魏
昌城寰宇記有石城在縣北四里李崇以功封魏昌伯故州人
以名城

碓石城在壽州西北二十五里碓石山兩岸相對淮水經其中

圖經荆塗二山相爲一脈禹鑿爲二以通淮流水經注淮水北
逕山破中謂之破石對岸山上結二城以防津要三國魏志甘
露元年諸葛誕據壽春司馬昭遣王景軍破石以偪之地理通
釋梁大同中於碓石山築城拒東魏卽今隸州下蔡城也以淮
水中流分界西岸者爲破石屬下蔡東岸者爲壽陽

劉關二城在壽州正陽鎮與潁州接界相傳先主與關壯繆分
城屯軍處按元史至正九年董文炳亦築兩城於正陽以遏宋兵

青岡城在壽州西二十五里西淝河側晉謝元等禦秦師時築
義昌城在壽州西南永初郡國志云安豐有義昌縣晉末嘗立
郡

狄城在壽州南亦名荻邱城梁普通五年裴邃自合肥拔魏狄
城本傳作狄邱城魏書李神傳爲陳雷太守領狄邱戍主水經

注肥水經狄邱東又會施水枝津又北至成德是也
黃城在壽州西梁置黃城戍尋置潁川郡於此寰宇記晉義熙
十二年置小黃縣在安豐西北三十里或即黃城也又西有郭
默城相傳晉咸和中郭默常屯此陳太建五年吳明徹攻壽陽
別將克黃城郭默城降是二城相近也

蒼陵城在壽州西陳書宣帝紀太建五年齊遣兵援蒼陵魏書
地形志壽春縣有蒼陵城水經注淮水自潁口左又東南經蒼
陵北是也

安城故城在壽州南魏書地形志梁置新興郡治安城縣即此
馬頭戍城在壽州西北二十里淮濱戍守處也魏書地形志梁
郡蒙縣有馬頭城梁天監五年取魏合肥魏人守壽陽於馬頭
置戍普通五年梁取壽陽亦置於此或以為即馬頭郡誤又馬

頭城東南有白捺城又南有歐陽城皆梁魏邊戍之地

魚林城在壽州南安豐塘側鴛鴦門又鬪雞城在州西南三十

里又西城在州北元將董文炳築

下蔡故城今鳳臺縣治也本春秋時州來邑左傳成公七年吳

伐楚入州來哀公二年蔡昭侯自新蔡遷於州來謂之下蔡漢

書地理志沛郡下蔡故州來國為楚所滅後吳取之是也後漢

屬九江郡晉屬淮南郡劉宋時廢南齊建元三年垣崇祖在壽

陽恐魏人復寇淮北乃徙下蔡戍於淮東梁大通中魏亂梁得

下蔡改置汴州及汴郡北齊郡廢隋仍為下蔡縣屬汝陰郡唐

武德四年於縣置渦州八年州廢仍屬潁州五代周顯德四年

徙壽州治下蔡自後常為州治至元末廢入州水經注淮水自

碭石北逕下蔡故城東淮之東岸又有一城即下蔡新城二城

對據翼帶淮濱寔宇記梁大同中於破石築城以拒東魏即今縣城也故城淮水東岸者是也又棟城在下蔡西北花苑城在下蔡城東南五里

符離故城今宿州治本楚邑戰國策楚南有符離之塞秦置縣屬泗水郡史記秦二世元年陳勝令符離人葛嬰將兵徇蕪以東漢元狩元年封路博德為侯國屬沛郡王莽改曰符合後漢屬沛國三國魏屬汝陰郡晉仍屬沛國後廢寔宇記北齊天保七年移斛城縣於古符離城復為符離縣隋大業二年移於朝斛城唐貞觀元年移於竹邑城舊志元和四年於埔橋置宿州其後復移治符離城即今州治也元至元三年併入州縣遂廢魏書地形志斛城縣有扶離城當即符離之訛州志今為符離集在州東北二十里

蕪縣故城在宿州南本楚邑秦置縣史記楚王負芻四年秦王翦追破楚師至蕪南殺將軍項燕二世二年陳勝起兵於蕪漢高帝十二年帝自將討黥布與布軍遇於蕪西尋以縣屬沛郡為都尉治後漢屬沛國三國魏屬汝陰郡晉屬譙郡劉宋因之南齊為北譙郡梁為譙州魏書地形志蕪城郡蕭衍置魏因之領蕪城縣武定六年置隋書地理志彭城郡蕪舊唐書地理志蕪縣舊治穀陽顯慶元年移今治元和四年改屬宿州又有庸城在蕪西寔宇記縣北至州三十六里舊志元至元二年併入宿州今為蕪縣鄉有蕪縣集考蕪縣自南北朝至唐改遷無定寔宇記所云至州三十六里者唐顯慶所移治所也臨渙故城在宿州西南春秋時宋銓邑秦置銓縣二世紀陳勝自蕪攻銓鄩皆下之漢屬沛郡魏屬譙郡晉因之劉宋時縣廢

元和郡縣志臨渙縣西至亳州一百六十里本漢鉅縣梁普通中克魏鉅城因置臨渙郡以臨渙水爲名東魏改置渙北縣齊郡廢改渙北曰臨渙屬譙郡隋開皇三年於縣置譙州大業初仍屬譙郡唐武德四年又於縣置北譙州貞觀十七年州廢屬亳州元和九年改屬宿州寔宇記臨渙縣在州西南九十里又有古臨渙城在縣西北二十五里隋大業十年移縣於此唐貞觀十年遭水移入鉅城內宋大中祥符七年復以臨渙縣屬亳州天禧五年還屬宿州元至元二年併入宿州舊志臨渙城在州西南九十里今爲渙陽鄉又有臨渙集又有鉅城在州西南四十六里

相鄉故城在宿州西北本宋邑戰國策黃歇說秦昭王曰魏氏將出而攻鉅陽蕭相故宋必盡是也秦置相縣爲泗水郡治史

記二世二年章邯別將司馬卮將兵北定楚地屠相至碭漢高帝四年改爲沛郡仍治相王莽改爲吾符亭後漢建武二十年徙中山王爲沛王仍治相縣魏屬汝陰郡晉屬沛國劉宋南齊屬北沛郡隋時縣廢併入蕭符離水經注睢水東逕相鄉故城城卽宋共公之所都也國府園中猶有伯姬黃堂基卽伯姬焚死處括地志相城在符離縣北九十里元和郡縣志蓋相土舊都之所州志今爲相城鄉或譌爲襄城

竹邑故城在宿州北漢置縣屬沛郡高帝十二年賈參破英布自蘄遷竹邑卽此後漢永初六年封彭城王恭子阿奴爲侯邑屬沛國晉曰竺邑後省水經注睢水東逕竹縣故城南寔宇記朝鮮城西南七里有竹邑故城縣志有符離城今爲符離集亦曰舊宿州城在州北二十五里卽故竹邑也又按魏書靈徵

志孝文帝延興元年於徐州竹邑戍得著南齊紀建元二年徐州刺史崔文仲拔魏竹邑戍是縣為戍也梁紀大通元年成景儁克魏竹邑魏志睢州南濟陰郡治竹邑城不云置縣隋志符離有竹邑縣梁置睢州開皇二年州廢又廢竹邑縣入焉亦不詳何年復置唐貞觀初移符離縣治此其後還治故城而此城廢

陽城在宿州南秦置縣陳勝生此魏時縣廢綱目質實陽城故阯在鳳陽府宿州南

靈璧故城在宿州西北史記漢二年項羽自蕭晨擊漢軍追至靈璧睢水上注孟康曰靈璧故小縣在彭城南括地志故城在符離縣西北九十里漢時縣廢宋元祐時復置於宿州之東者今之靈璧也

仁州故城在靈璧縣東南魏書地形志仁州梁武置魏因之治赤坎城陳書太建五年吳明徹師次仁州隋書地理志彭城縣有齊置仁州大業初廢入元和郡縣志赤坎故城在虹縣西南五十九里梁天監八年置赤坎戍於此

浚縣故城在靈璧縣南五十里漢侯國後漢為縣屬沛郡漢書應劭注浚縣浚水所出東晉後廢水經注浚水東南逕浚縣故城北魏書地形志穀陽郡連城縣有濠城寰宇記濠城在虹縣西南七十五里即漢浚縣地縣志今為濠城集在縣南五十里穀陽故城在靈璧縣西南漢置縣屬沛郡地理志注應劭曰在穀水之陽魏書地形志穀陽郡治穀陽城太和中置鎮世宗改置陽平郡孝昌中入梁武定六年復取之置穀陽郡領縣二連城高昌水經注苞水又東逕穀陽縣又東逕穀陽戍南又東南

重刊汝南通志 卷五十一
逕穀陽故城東北舊志唐顯慶五年省入蘄縣故城在縣西南七十五里又有連城鋪在縣南百里因故縣爲名
臨潼故城在靈璧縣東北魏書地形志睢州臨潼郡隋書地理志下邳郡夏邱東魏置臨潼郡後齊改爲潼郡開皇初廢金志宣宗元光初議於靈璧縣潼城鎮設倉都監卽故縣也水經注潼水又東南逕臨潼戍西縣志今爲潼郡鄉在縣東北七十里固賢城在靈璧縣北七十里又有古城在縣西北百里近河岸霸王城在靈璧者有三一在縣西南七十里一在縣西北七十五里一在縣北七十二里皆項羽屯兵之壘
廢汴郡在懷遠縣西南魏志譙州有汴郡梁武置治蕭縣有平阿山其地當在今縣西南與壽州之廢下蔡縣相近縣志今茨河南劉家集東有長埂數里疑卽是

臨濠郡在定遠縣梁置

陳畱廢郡在壽州南晉書地理志咸康四年於此譙立陳畱郡宋書州郡志南豫州刺史陳畱太守晉立領浚儀小黃雍邱白馬襄邑封邱尉氏七縣齊書州郡志豫州陳畱郡領浚儀小黃雍邱三縣魏書地形志揚州陳畱郡領浚儀雍邱二縣隋書地理志安豐有梁置陳畱郡開皇初廢寰宇記陳畱廢郡在安豐縣東北五里浚儀廢縣在縣東北二百五十步芍陂塘下雍邱廢縣在縣南六十里小黃廢縣在縣西北三十里此一郡三縣皆晉義熙十二年劉義慶奏置隋開皇三年廢郡及浚儀雍邱二縣其小黃縣唐廢按李氏光洛云宋南豫州陳畱郡齊豫州陳畱郡均治今亳州
陽平廢郡在靈璧縣南晉書地理志元帝於徐州僞置陽平郡宋書州郡志郡領館陶濮陽二縣舊志秦始中入魏蕭齊建元

二年徐州刺史崔文仲過淮攻拔荏眉戍殺平陽太守郭杜羝
後魏世宗於穀陽置陽平郡蓋因故郡相近爲名

朝歌廢縣在廢臨淮縣東劉宋僑置宋書州郡志鍾離太守朝
歌令南齊後魏因之齊周時廢魏收志云縣有九山城黃溪水
今黃溪在縣界東

灌邱舊縣魏志鍾離郡領灌邱縣又有邵陽城在廢臨淮縣東
北邵陽州上南史齊武帝二年魏王攻鍾離不拔築城於邵陽
州上柵斷水路夾築二城

已吾廢縣在懷遠縣北宋書州郡志馬頭郡有濟陽縣齊志馬
頭郡治已吾縣永明元年罷譙郡屬二年以濟陽縣併之魏書
志馬頭郡已吾縣隋志已吾義成二縣後齊併以爲臨淮縣縣
志已吾廢縣在今縣孔岡卽平阿故城魏志仁州臨淮郡亦有

已吾縣

北譙廢縣在壽州東南齊書州郡志豫州梁郡北譙縣魏書地
形志揚州北譙郡北譙縣隋書地理志壽春有北譙郡開皇初
廢寔字記廢北譙縣在壽春縣東六十三里故曲陽縣
肥陵廢縣在壽州東南漢書淮南厲王傳殺開章葬之肥陵邑
唐書地理志安豐武德七年省肥陵縣入焉括地志肥陵故縣
在安豐東六十里

成德舊縣在壽州東南漢置縣屬九江郡後漢因之晉屬淮南
郡水經注肥水經成德縣故城西又北至芍陂是也
崇義廢縣在壽州東南宋書州郡志南梁太守崇義令羌人所
立魏書地形志梁郡治崇義寔字記在壽春縣東南三里宋略
云太初元年遷金墉人於壽陽號爲崇義縣又廢蒙縣在縣南

二百里宋志南梁郡領蒙崇義等縣隋末廢

廣平廢縣在宿州西南魏書地形志靳城郡治廣平武定六年置又有艾平城齊周時廢寰宇記靳縣有艾平城在縣西十五里周齊以前於中置靳縣唐貞觀元年移縣治穀陽而故城遂廢

白揮廢縣在宿州西南魏書地形志臨渙郡領白揮縣治白揮城又有東魏白揮縣隋大業初省入臨渙縣舊志有百善集在宿州西七十里蓋卽白揮之訛

定陶廢縣在宿州北後魏僑置屬南濟陰郡齊周時廢寰宇記在符離縣北四十里定陶山下
新豐廢縣在宿州北後魏武定六年置屬睢南郡齊周時廢舊志今爲新豐集在州北七十里

斛城廢縣在宿州東北魏書地形志睢州有睢南郡梁武置沛郡武定六年改治斛城縣梁武置淮陽縣亦武定中改隋書地理志符離縣有齊置睢南郡隋開皇初廢舊唐書志符離縣舊治朝斛城貞觀元年移治竹邑城寰宇記魏斛城縣齊天保七年移治古符離城復曰符離隋大業二年復移於朝斛城唐貞觀初又移於朝斛城西南七十里竹邑城而此城廢水經注淠湖水東至朝解亭卽朝斛之訛

甯邱廢縣在宿州東北六十里漢置縣屬楚國晉省水經注淠

湖水西居甯邱縣故城東

按甯漢書三國志皆作甯二字同

諸陽舊縣在宿州西北唐武德四年分符離縣置貞觀元年省入符離舊志今州西北有諸陽山蓋故縣在此州志在定陶縣故地

丹城舊縣在宿州西南隋書地理志臨渙後魏置臨渙郡又別置丹城縣開皇元年省又丹陽集在州西南仁義鄉卽故丹城縣地

連城舊縣在靈璧縣南魏志穀陽郡領連城縣齊周時廢有連城鋪在縣南百里蓋因故縣爲名

南華樓在廢臨淮縣逍遙臺前明萬曆中重建有莊周像

望僊樓在廢臨淮縣城內市樓東相傳唐藍采和仙去人於此樓望之因名

清淮樓在廢臨淮縣舊濠州治子城上唐張頤詩觀魚惠子臺

蕪沒夢蝶莊生冢木秋惟有清淮供四望年年依舊背城流

元勳閣在府治西南明初爲功臣建

含桃閣在廢臨淮縣舊濠州治東昔爲郡廨西齋宋梅詢爲守

呂夷簡爲倅以此爲宴憩之地

第一山亭在府治龍興寺內明洪武十六年建御書第一山

三大字碑

四望亭在舊府城南唐刺史劉嗣之建李紳過淮爲作記紳渺

小時號短李俗呼爲短李亭宋蘇軾詩頽垣破礎沒柴荆故老

猶言短李亭卽此

枕淮亭在舊濠州治子城上宋建一名望淮

翛然亭在廢臨淮縣舊濠州治倅廳舊名觀瀾宋元祐中王雍

爲通判因晉簡文帝翛然臨水便有濠濮閒想語乃易今名

聖水亭在懷遠縣大禹廟前歲旱禱雨輒應元人構亭其上

古宛唐亭在定遠縣西南宋書殷炎傳遣將劉順東據宛唐水

經注閭閻水西北經死學亭南夾橫塘西注齊永元二年蕭懿

討裴叔業亦屯兵於此按黃回王敬則等傳作死虎水經注作死虜皆字形之訛

對池亭在定遠縣西北七十里相傳宋趙倚所作池即槎枒寺

白蓮池

鵲甫亭在定遠縣水經注洛澗又北合鵲甫谿水西北流經此

亭下

雞備亭在安豐故城西南春秋昭公二十三年吳敗頓胡沈蔡

陳許之師於雞父杜注安豐南有雞備亭是也

黎漿亭在壽州東南三國志魏甘露中吳將朱異救諸葛誕於

壽春進屯黎漿南史普通五年裴邃拔魏荻城臂城進屯黎漿

水經注芍陂灣北分為二水一水東注為黎漿水又東徑黎漿

亭南又東注肥水謂之黎漿水口

古尉武亭在壽州北宋書劉康祖傳元嘉中劉康祖還守壽陽

至尉武去壽陽數十里為魏承昌王庫仁真追及即此

晝涼亭在壽州北五里下有石屋

袤亭在宿州西左傳桓公十五年公會宋公衛侯陳侯于袤伐

鄭杜注沛國相縣西南有古袤亭

芳亭在宿州北即唐咸通中官軍敗賊處又州城內有柳溪亭

扶疏亭在宿州北城上宋蘇軾守徐時嘗遺墨竹一本於宿

人鐫石構亭貯焉故名扶疎明宏治初州守曾顯庸修復之

張氏園亭在靈璧西鳳山下汴隄北或曰在鹿鳴門外附宋蘇

軾張氏園亭記道京師而東水浮濁流陸走黃塵破田蒼莽者

外修竹森然以高喬木蔚然以深其中因漫之思椅桐檜柏有

取池山之怪石以為巖阜蒲葦蓮芡有江湖之思椅桐檜柏有

山林之氣奇花美草有京洛之態鄰里魚鼈蒲葦可以饒四

可以隱其富可以養其榮蔬可以飼鄰里魚鼈蒲葦可以饒四

方之賓客余自彭城移守吳興由宋登舟三宿而至此其

叩門見張氏之子碩碩求余文以記之惟張氏世有顯人自其

伯父殿中君與其先人通判府君始家靈璧而為此園作蘭皋之亭以養親其後出仕於朝名聞一時推其餘力日增治之於今五十餘年矣其木皆十圍崖谷隱然凡園之百物無一不可人意者信其用力之多且久也古之君子不必仕不必仕必仕則忘其身必不仕則忘其君譬之飲食適於饑飽而已然士罕有蹈義赴節其處者安於故而難出於者狃於利而忘返於是子孫之計慮深且周是故築室藝園於汴泗之間舟車冠蓋之衝凡朝夕之奉燕遊之樂不求而足使其子孫開門而出仕則跬步清朝之上閉門而歸隱則俯仰山林之下於以養生治性行義求志無適而不可故其子孫仕者皆有循吏良能之稱處者皆有節士廉退之行蓋其先君子之澤也余為彭城三年樂其土風將去不忍而彭城之父老亦莫余厭也將買田於泗水之上而老焉南望靈璧雞犬之聲相聞幅巾杖屨歲時往來於張氏之園以與其子孫遊將有日矣

觀魚臺在府城西七里濠水經其前元和郡縣志莊子與惠子觀魚處亦名莊周臺又有莊子臺在靈璧縣潼山
逍遙臺在廢臨淮縣東門內開元寺後唐濠州防禦使梁延嗣累土為臺即莊子墓也上刻莊子像覆以亭

義臺在定遠縣東二十里縣志五代時有梅氏居此宗族聚居鳴鼓會食南唐後主築臺表之
判虎臺在定遠縣治相傳宋包拯為令時有虎傷人拯移牒於神虎自赴縣繫於臺前石今臺石俱存
春申君臺在壽州城東北隅相傳楚春申君黃歇築
鳳皇臺在壽州南門外
鬪雞臺在壽州西南三十里明統志俗傳二金雞鬪於此
米家臺在壽州正陽鎮西門相傳宋米芾所築
曬書臺在宿州北八十五里閔芋墓側
籌河臺在宿州符離北岸明工部侍郎白昂即中婁性督理河務相籌於此
望荆臺在靈璧縣荆人宦此思親築臺望焉今斷碑存

吹簫臺在靈璧縣西北七十里

觀星堂在府城獨山頂上明洪武初建

三賢堂在廢臨淮縣城東北隅宋時建祀彭祖莊子惠子明正

統二年沒入於淮

威信堂在廢臨淮縣舊濠州治宋淳熙時郡守王回陞辭上諭

以守邊之道無出威信二字因以名堂

靜正堂在廢臨淮縣舊濠州治堂後又有清風堂皆宋時建

薛長卿宅在宿州相城內中元寺長卿初以魯詩傳龔勝龔舍

後為御史大夫東歸沛守遠迎尊禮殊至郡人以為榮

桓譚藏書處在宿州漢成帝以譚藏書多令待詔門下時謂挾

桓君山之書富於猗頓之財今蕩花墅是也

水館在廢臨淮縣濠州治唐張祐有詩又高唐館在舊濠州治

西

亳社在宿州相山宋共公都相因置亳社

潛龍殿在廢臨淮縣開元寺內南唐李昇微時嘗寓寺中故名

弈壇在廢臨淮縣西南二里會仙觀前刻石為碁枰傍有二窟

可置子

劉猷故里在宿州相城澤門內

桓榮故里在宿州南平鎮南

漆園在定遠縣東六十里寧宇記即莊周為吏處唐天寶中尚

有漆樹一二十株野火燔燒今為壟畝按漆園非定遠地說詳流寓莊子傳後

隋隄在宿州隋書煬帝自板渚引河達於淮海謂之御河河畔

樹以柳按今之汴隄即隋之御道煬帝由此幸江都在眉戍在懷遠縣西北魏置齊建元二年魏人攻鍾離徐州刺

史崔文仲遣兵渡淮攻破其柱眉戍是也

禹墟在懷遠縣東南應劭曰當塗縣有禹墟水經注禹墟在塗山西南濠水西北經禹墟北縣志塗山南有禹會村即古禹墟宋蘇軾詩曰樵蘇已入黃熊廟烏鵲猶朝禹會村是也野客叢談塗山有四一會稽二渝州三濠州鍾離縣四宣州當塗縣皆立禹廟

垂花鳴在廢臨淮縣治東上有椽藤垂花唐刺史獨孤及愛之因命以名有詩并序

夢蝶坊在廢臨淮縣開元寺西世傳莊周嘗寓此

惠子窰在廢臨淮縣治西南三里相傳惠子遊濠上居此

撒金街在廢臨淮縣內世傳藍采和曳錢仙蹟在此

睡仙崖在廢臨淮縣曲陽門外有石崖長二丈餘中有一段平

坦約六尺世傳有仙嘗臥此

乘龍洲在廢臨淮縣東北淮水中流府志周世宗征濠夜遣兵持炬乘橐駝絕淮濠兵驚以為鬼乘龍也

石寨在府萬歲山頂築有石垣

連珠寨在壽州北五里紫金山巒有石磬大路遺阯尚存周世宗屯兵處

花靨鎮在壽州西北二十五里名勝志引繫年錄云宋紹興二年廬壽鎮撫使王亨收復安豐軍之花靨鎮後因為權場蓋州境戍守要地也俗傳以壽陽公主得名

相墟鎮在宿州西南曲溝鎮在州北柳子鎮在州西皆金設也又靜安鎮李氏說在宿州地

黃圍鎮在宿州北三十里金設縣志北有黃疇集至城三十里

西固鎮在靈璧縣西南七十里金設縣志作九十里有固鎮即古穀陽鎮也

趙步在鳳陽縣東北淮河北岸水濱泊舟之地五代梁乾化三年王景仁侵廬壽淮南將徐溫等遇於趙步舊志以趙氏居此因名胡氏曰趙步南直紫金山

曹營在靈璧縣西南一百三十里相傳曹操立營於此

垓下聚在靈璧縣東南史記高祖與諸侯共擊楚軍與項羽決

勝於垓下漢書地志浚縣有垓下聚元和郡縣志垓下聚在虹

縣西南五十四里舊志在靈璧縣東南陰陵山之南

樓子莊在靈璧縣西三十里

戚家灣在靈璧縣北七十里小河南相傳為漢高祖戚夫人故里

大澤鄉在宿州西南故蘄縣西史記陳涉世家行至蘄西大澤

鄉遇雨失期乃同謀起兵漢書徐廣注在沛郡蘄縣水經注蘄

縣有大澤鄉又垂鄉亦在故蘄縣西史記黥布傳布與上遇蘄

西會垂按漢書作會甄水經注作垂鄉

馬邱聚在懷遠縣南後漢志當塗縣有馬邱聚縣志即宋之馬

頭郡也一名馬邱城一名藍柵城

飲馬池在壽州東南百里相傳漢英布飲馬於此

畱犢池在壽州城西南隅水經注漢時苗來令壽春駕一犢牛

後生犢一及去任曰此淮南所產也畱之州人遂以名池

淬劍泉在府遺碑村相傳莫邪劍成以此水淬之

楚泉在定遠縣西六十里漢泉在定遠縣西五十里源出楚泉

二泉並行自南而西合流入洛達於淮

咄泉在鳳臺縣城北五里寧宇記其泉波平無浪若人至其旁

大聲則大涌小聲則小涌咄咄則涌彌甚州志一名珍珠泉
蓋屋槃在府治南山中古槃也

行色詩石刻在壽州舊安豐縣宋侍制司馬池嘗監酒稅作行
色詩後孫宏爲之刻石

漢碑在宿州相祠內八分體所謂三百有五碑也又有宋宣和
封崇惠侯敕碑亦在祠內

漢戚伯著碑秀水朱彝尊跋云宋嘉祐中宿州浚汴獲之泥沙
中

解帶石在廢臨淮縣清流門外俗傳項羽解帶飲石上卽此
宣和石在靈璧縣西汴隄上王鳳竹記謂是朱劭花石網偶遺

於此按宋史陳邁傳邁徙淮南轉運使維時汴隄之運渠壅塞
遣使決呂城陳公兩塘達於渠漕運甫通而朱劭花石網
塞路官舟不得行邁捕繫其入上章自劾此石當是彼
時所棄非偶遺也事在徽宗宣和元年故名曰宣和石

重修安徽通志卷五十一

輿地志

古蹟

八
穎州府

汝陰故城今府治秦置縣屬潁川郡漢屬汝南郡史記漢高祖
六年封夏侯嬰爲汝陰侯後漢更始二年封宗室信爲汝陰王
是也三國魏始置汝陰郡自是州郡皆治此寰宇記隋大業末
郡城爲賊房獻伯所陷郡人江子建設柵爲險以禦之唐武德
四年平王世充子建舉州來屬詔授子建信州刺史卽其柵處
築城謂之信州城東南距故州城十里貞觀二年復爲潁州移
入汝陰舊城宋開寶六年移汝陰縣治於州城東南十里後復
舊元至元二年省舊志今州有二城南城土垣周五里有奇相

傳汝陰故城也北城甃石修砌周四里有奇洪武中所築二城
相連並爲州治

寢邱城在府治西北一百二十里元和郡縣志孫叔敖子辭肥
饒而請寢邱卽此

東城西城俱在府治西北七十里五樟林兩城相去三十里相
傳唐置府兵築城屯守於此

唐屯城在府治西南一百七十里龍項灣東相傳南唐時劉仁
瞻築

永安故城在阜陽縣西南唐武德四年於汝水北岸置永安縣
屬信州六年與州俱廢舊志永安故城在潁州西南一百四十
里汝水北岸其北三里又有縣治子城

清邱故城在阜陽縣東隋置隋書地理志汝陰郡清邱梁曰許

昌隋開皇十八年改名曰清邱唐書地理志貞觀元年省清邱
大汝陰寔字記清邱城在汝陰縣東五十六里州志在潁水北
岸旁有清邱故名

地里城在阜陽縣西南一百十里汝水北岸元至順閒置潁水
縣於此至正閒廢

平輿故城在阜陽縣南魏書地形志潁州有平輿安城等縣梁
置屬汝南郡齊周時廢舊志平輿故城在潁州南百里北枕谷

河周五六里土城尙完俗呼爲遠城按平輿漢縣南北朝亦謂之懸瓠城高齊縣廢隋析
新蔡復置唐未因之以今輿地考之在河南汝甯府汝
陽縣東南六十里與潁境懸隔其故城不應在阜陽

任城在阜陽縣北三里元和郡縣志陳將任忠伐齊於潁水北
岸築城以圍汝陰故名府志俗呼蠻奴寨蠻奴忠字也
潁上故城在今潁上縣南卽古鄭城也梁普通六年裴邃拔魏

鄭城汝潁間皆響應隋書地理志梁置下蔡郡後齊郡廢大業三年於故鄭城置潁上縣舊唐書地理志潁上縣隋置治古鄭城武德四年移今治元和郡縣志潁上縣西北至潁州一百七十里本漢慎縣地寰宇記鄭城在今潁上縣南慎縣故城在潁上縣西北左傳哀公十六年吳人伐慎楚白公敗之漢置慎縣屬汝南郡後漢建武二年改封宛王賜為慎侯尋復為縣魏正元二年毋邱儉討司馬師兵潰自項夜走慎縣晉屬汝陰郡劉宋改置慎縣於合肥屬南汝陰郡此城遂廢其地在今縣西北四十里江口鎮

甘城在潁上縣北後漢建武二年封族子敏為甘里侯章懷太子曰潁州潁上縣西北有甘城通典故甘城梁置下蔡郡有關吳魏以來為關防津濟之所縣志今為甘城驛

武陰城在潁上縣東南正陽鎮土城周三里被水頽廢俗謂之張飛城與劉關二城相對

荆亭城在潁上縣西南六十里劉宋泰始五年汝陰太守楊文萇破魏兵於荆亭即此魏書地形志汝陰郡宋縣有荆亭城水經注潤水經荆亭北而東入淮

段家城在潁上縣西北六十里相傳段靈君築又有淇城在縣東三十里

西正陽城在潁上縣東南六十里元董文炳築兩城以遏宋兵後譌以為先主城關王城金史有正陽鎮李氏說在縣東南七十里其近此歟

安豐故城在霍邱縣西南九十里漢置縣在今河南固始縣界三國魏置安豐郡於此晉安帝時省為縣屬弋陽郡劉宋末復

立寔字記安豐縣在霍邱縣西南一百三十里梁天監元年移於霍邱戍城東北大同元年改爲安豐州此城遂廢又廢安豐州在縣南四十里東魏天平二年入梁大同元年徙舊安豐郡於此置州太清二年又入東魏北齊天保七年廢州爲縣遂於無期村置安豐縣在縣東南三十八里屬楚州隋開皇三年移就芍陂下此城遂廢

陽泉故城在霍邱縣西漢置屬六安國後漢屬廬江郡靈帝中平六年封黃琬爲侯國晉爲廬江郡治宋廢後魏又僑置汝陰縣於陽泉城尋廢魏書地形志淮南郡汝縣有陽泉城寔字記廢決口縣在縣西五十五里梁普通七年於陽泉古城內立決口縣大通三年改爲臨水縣其城卽古陽泉縣泉從縣西南北流入決口城在泉水之陽故名

陽石城在霍邱縣南亦曰羊石梁天監五年廬江太守裴邃克魏羊石城胡三省通鑑注羊石城在廬江西北霍邱東南

蓼城在霍邱縣東三十里虞夏之際以封皋陶春秋時蓼國地唐武德四年於霍邱置蓼州

箕子城在霍邱縣開順鎮又有紂王城在縣東南二十里又有墩城在縣南七十里

廢義城在霍邱縣北四十里寔字記宋高祖立亦名三固縣後廢縣立戍縣志今有義城臺在縣東北三十五里高十丈廣八十丈爲戍守之所

譙縣故城今亳州治春秋陳焦邑史記周武王封神農之後於焦左傳僖公二十三年楚成得臣帥師伐陳遂取焦夷杜注焦今譙縣也秦置譙縣漢屬沛郡後漢書郡國志豫州刺史治譙

中平四年曹操生子丕於譙魏黃初二年改建五都譙其一也
 晉仍為譙郡治大甯二年祖約退保壽春而譙陷宋書州郡志
 譙郡徙治蒙有陳畱郡寄治譙郡界魏書正始四年營田大使
 范紹以徐豫二境民稀土曠譙城形要之所更立一州名曰南
 兖治譙城中興元年南兖州民王乞德劫刺史劉世明以州降
 梁明年梁將元樹入據譙城改州曰譙州元和郡縣志魏南兖
 州周武帝改亳州西北至宋州一百八十里本漢舊縣也
 下邑故城在亳州東北五十里後魏僑置孝昌元年屬臨渙郡
 興和中屬馬頭郡隋書地理志鄆縣有魏置下邑縣城齊廢
 梅城故城在亳州南四十里隋書地理志開皇六年分小黃縣
 置屬亳州大業三年省入譙縣元和郡縣志故梅城在譙縣南
 四十里古梅伯國州志今為梅城集

武平城在亳州西南漢縣
 藥城故城在亳州東南唐書地理志唐武德三年於魯邱堡置
 文州並藥城縣七年省入城父寰宇記藥城在城父縣南七十
 二里
 扶陽故城在亳州東北元和郡縣志在故城父縣東北三十二
 里漢韋賢封邑按漢表扶陽國在蕭縣北城名偶同耳非故國
 也

城父故城在渦陽縣西三十二里舊屬亳州春秋時陳夷邑左傳昭
 公九年楚遷許於夷實城父史記秦二世二年盜殺陳勝於城
 父漢為縣屬沛郡後漢屬汝南晉屬譙郡劉宋僑置浚儀縣屬
 陳畱郡以城父縣併入隋開皇十八年復改浚儀曰城父屬譙
 郡隋末王世充於縣置成州唐初州廢屬亳州元和郡縣志縣

西北至州七十九里天祐二年避朱全忠父諱改曰焦夷光啟
初秦宗權寇亳穎朱全忠敗之於焦夷是也五代梁龍德初改
焦夷曰夷父後唐同光初復曰城父宋亦屬亳州元省入譙縣
尋復置明初廢水經注夏肥水東南流逕城父故城亳州志今
名城父村

新鄴故城在太和縣北史記蘇秦說魏襄王曰南有新鄴又安
釐王十一年秦拔鄴邱漢置新鄴縣屬汝南郡應劭曰魏鄴邱
漢興爲新鄴也後漢建武中封郭后從兄竟爲新鄴侯章帝建
初四年徙封殷後於此更名宋公國三國魏廢爲宋縣屬汝陰
郡景初二年以縣屬譙郡晉廢魏太和元年復齊周時省水經
注細水又東逕宋公縣故城北章懷太子曰宋公故城在汝陰
縣西北舊志在縣北七十里俗訛爲宋王城

新陽故城在太和縣西北史記秦二世二年呂臣爲蒼頭軍起
新陽注應劭曰在新水之陽後建武中封陰識弟就爲侯國三
十年改屬淮陽永元十一年還屬汝南晉省水經注新水東北
流逕新陽縣故城縣志有信陽城在縣西北六十里卽古新陽
之訛也

潁陽故城在太和縣東北三里阜陽縣志作
在縣東八里文獻通考後漢建
武二年封祭遵爲潁陽侯隋書地理志汝陰郡潁陽縣梁曰陳
畱并置陳畱郡開皇初郡廢十八年改縣曰潁陽屬潁州唐貞
觀元年省入汝陰

萬壽故城在太和縣北本漢細陽縣隋唐汝陰縣之地宋置縣
寔字記萬壽縣在潁州北九十里本汝陰縣百尺鎮開寶六年
分汝陰縣北萬壽等五鄉置縣以唐鄉萬壽爲名後改曰太和

元至元二年省入州大德八年復置移今治縣志故城在縣東北四十里今為元牆集又有舊縣集在縣北八里臨沙河細陽故城在太和縣東茨河西岸漢置縣後漢光武封岑彭子遵為侯邑晉廢寰宇記在汝陰西北四十里

樂昌城在太和縣東近細陽漢高后八年封張敖前姬子壽為樂昌侯注徐廣曰今細陽之池陽鄉是也南北朝時嘗置樂昌縣於此

渦陽故城即今蒙城縣治蕭齊嘗置馬頭郡後魏太和十八年齊馬頭太守孟表據郡來歸除南兗州刺史仍領馬頭太守鎮渦陽梁大通中陳慶之攻拔魏渦陽詔以渦陽置西徐州太清初魏將慕容紹宗敗侯景於渦陽其地遂復入魏改置譙州南譙郡隋書地理志譙郡後魏置渦陽縣開皇十六年改渦陽為

肥水大業初改曰山桑水經注渦水又東逕渦陽城北元和郡縣志蒙城縣西北至亳州一百四十里北臨渦水即魏渦州城也

山桑故城在蒙城縣北漢置縣後漢建武二年封王常為侯國晉永和九年殷浩追姚襄至山桑為襄所敗其後僑置於淮南而故城遂廢水經注北肥水逕山桑邑南俗謂之北平城昔文欽封山桑侯疑食邑於此又東逕山桑縣故城南俗謂之都亭城蓋山桑有二城也寰宇記山桑城在今蒙城縣北三十七里又北平城在臨渙縣西南二十五里

瑕城在蒙城縣東北左傳成公十六年楚師還及瑕水經注渦水經瑕城南即楚瑕邑

舊蒙城在今蒙城縣西北三里東晉僑置郡治隋書地理志山

桑縣有梁置北新安郡東魏改置蒙郡齊廢郡置蒙縣後又置郡開皇初郡廢併縣入渦陽嘗宇記有南北二蒙城並在縣西北八十里相去四十步皆後魏太和七年築

檀公城在蒙城縣三十七里元和郡縣志蒙城縣檀公城本山桑縣城宋檀道濟為征北將軍居此因名路史謂為北蒙是也

財邱廢郡在阜陽縣西魏書地形志潁州有財邱梁興雙頭郡梁武置領財邱梁興等縣齊周時廢舊志潁州西南一百十里

有小土城二東西相去二三里俗謂之東才城西才城或以此為後魏財州誤財州今之河南沈邱縣也

原鹿廢縣在府治南富陂之西地理考實作太和漢置縣春秋僖公二十一年宋楚盟於鹿上杜注鹿上今汝陰原鹿縣也後漢建武十五年封陰識為原鹿侯國屬汝南郡晉屬汝陰郡宋

省水經注谷水徑原鹿縣故城北

富陂廢縣在阜陽縣南漢置縣屬汝南郡後漢建武二年封王霸為富陂侯國十三年罷關駟十三州志永元九年分汝陰復置以多陂塘溉稻故曰富陂晉省水經注谷水經富陂縣故城

北俗謂之成閭亭按兩漢書志汝南郡有富陂無富陂

胡城廢縣在阜陽縣西北二里春秋胡子國左傳定公十五年楚滅胡以胡子豹歸杜注汝陰縣西北有胡城魏書地形志胡

城梁置屬潁州西恆農郡尋廢水經注潁水又東南流逕胡城東寔宇記胡城在汝陰縣西北二里

博鄉廢縣在霍邱縣南漢竟甯元年封六安繆王子交為博鄉侯國屬九江郡王莽改曰揚陸後漢廢水經注博安縣即地理志之博鄉縣也又三國魏甘露二年諸葛誕據壽春吳遣朱異

赴救異畱輜重於都陸進征黎漿胡三省曰都陸即揚陸也江南通志載博鄉舊縣於六安州誤

安風廢縣在霍邱縣南二十里漢置縣屬六安國後漢屬廬江郡三國魏置安豐郡治安風縣安帝時改屬弋陽郡東魏時廢杜佑曰霍邱城北有安風津或譌風為豐

松茲廢縣在霍邱縣東十五里漢初置松茲侯國在今宿松縣界晉初改置於此屬安豐郡齊永元中改入北新蔡郡隋廢唐武德四年復置屬蓼州七年廢

長垣廢縣在亳州東東晉初析譙縣地僑置後魏廢思善廢縣今渦陽縣治舊屬亳州後漢書郡國志有思善侯國屬汝南郡晉省水經注漢章和二年分城父縣置夏肥水又東逕思善縣之故城南亳州志有故城集在州南八十里城父城南疑

即其遺址

龍山舊縣在渦陽縣北舊屬宿州寰宇記廢龍山城在臨渙縣西四十五里北齊武平四年置隋開皇九年廢入臨渙今有龍山集摘星樓在霍邱縣東三十里紂王城內

繁陽亭在府治境內左傳襄公四年楚師繁陽杜注鮑陽南有繁陽亭

沈亭在府治西一百二十里秦高士沈郢建蔡亭在府城宋呂公著為穎倅作亭後圃題曰蔡亭及為守時休倅圃有蔡亭集

清潁亭在府治西湖上宋晏殊守潁時建蘇軾嘗與弟別於此有詩
雙柳亭在府治北渚宋晏殊守潁建閣曰清漣嘗手植雙柳於

閣前後去穎民不能忘更曰去思至歐陽修為守雙柳成陰遂
重建亭更名雙柳

竹間亭在府治西湖之北宋蘇軾守穎時作

古艾亭在阜陽縣西南一百七十里汝河之南與河南新蔡縣
接界魏書地形志梁興有艾亭邱

相讓臺在府治東二里相傳楚莊王所築避暑之所又有水臺
在府南一百里淮水所經相傳楚平王所築以觀淮水

釣魚臺在府治東七十里潁水北岸漢袁宏游釣處

賀勝臺在府治西北十里潁水南岸州志宋劉錡敗烏珠於順
昌州守陳規迎勞犒軍於此故名

張龍公釣臺在霍邱縣西北三十里

章華臺在亳州東南乾谿側新序楚王起章華之臺為乾谿之

役後漢書郡國志城父縣有章華臺元和郡縣志臺在城父縣

南九里按章華臺當在湖北荊州

東西二臺在亳州東一里許曹操觀稼臺也

八角臺在亳州東南三里舊傳曹操所築大饗軍士於此又蒙
城縣東有操演武臺

子牙釣臺在蒙城縣西南三十里呂望集

莊子臺舊阯在蒙城北隅因沒於水改築於東門外

會老堂在府城西湖書院之傍宋歐陽修與趙槩同在政府熙
甯中相繼告歸一日槩來汝陰年幾八十矣遊宴踰月而返因
名其堂曰會老

六一堂在府城內歐陽修致政歸穎時所構

聚星堂在府城舊州治內宋歐陽修守穎州一時從遊者皆名

流故以聚星名堂

大饗臺在亳州城內魏文帝南征軍次譙大饗六軍及譙父老百姓立大饗碑曹植文梁鵠鍾繇書篆時稱三絕

清燕堂即蒙城縣治後堂宋王安石有清燕堂詩

元張柔故宅在亳州城內西街之北

魏武故宅在亳州東三國志建安十五年令曰欲於譙東五十里築精舍秋夏讀書冬春射獵以自娛元和郡縣志魏文帝祠在譙縣東五里即太祖故宅

陳搏店在蒙城縣南五十里有陳仙公館

青楊館在府治西一百四十五里相傳漢光武討王尋駐兵於此

焦館在府治西南隅水池上宋呂公著守郡時建以館焦千之

因名

交地在潁上縣北二十五里俗傳孔子適楚接輿歌鳳處

潁尾在潁上縣東左傳昭公十二年楚子守於州來次於潁尾是也禹貢錐指潁水東南流至正陽鎮入淮謂之潁口即春秋之潁尾也

管谷在潁上縣北二十五里管仲家此

霍邱戍即今霍邱縣治梁置霍邱戍本安豐郡地隋時改置今治水經注淮水又東為安豐津水南有城故安豐都尉治後立霍邱戍寔字記又有金明城在霍邱縣西南一百二十里

下城父聚在渦陽縣舊屬蒙城史記秦二世二年陳涉之汝陰還至

下城父為其御莊賈所殺後漢書郡國志山桑縣有下城父聚蒙城志在縣西北八十里渦水之陽以近故城父縣故加下

垂惠聚在蒙城縣西北二十里後漢建武三年蓋延等攻破劉永於睢陽永將蘇茂周建奔垂惠四年遣馬武等圍垂惠後漢書郡國志山桑縣有垂惠聚水經注郎山東有垂惠聚世謂之禮城

乾谿在亳州東南左傳昭公八年楚伐吳次於乾谿杜注在城父南寔字記在城父縣南五里

東陳村在府治東四十里宋嘉定十五年霍邱人王鑑敗金兵於此

關州村在潁上縣張龍公夫人石氏家此

包家寨在府治西六十五里又姜寨在府治西一百八十里俗呼為強寨

牛口埠在霍邱縣城東唐太宗追竄建德處

畢卓池在府治西銅陽城內

王家市鎮在阜陽北九十里金設案阜陽撥地入潁有王市集

椒陂鎮在阜陽縣南三十里金設互見出川

永甯鎮在阜陽縣東南一百里又櫟頭鎮在縣西六十里

江陂鎮在潁上縣西北四十里沙河南岸又正陽鎮在縣東南七十里皆金設也

雙溝鎮在亳州南六十里金設互見山川

斤溝鎮在太和縣北七十里金設

蒙館鎮在蒙城縣西北三里金設

龍池在潁上縣西南四十里淮潤鄉舊傳張公九子蛻骨化龍處與霍邱接壤

譙令谷在亳州北三十里魏武帝至譙令軍士築之有譙令碑

桑林在亳州湯陵西二里成湯禱雨之所

九仙曰在霍邱縣九仙山上俗傳淮南王與八公搗藥於此

谷陽在亳州西四十里

白龍井在霍邱縣汪家集東南淮河南岸有龍池相傳與井通後湮失其處同治六年夏旱知縣陸鼎敷求得之取水入城大雨隨至

九龍井在亳州城南唐書五行志開元二十九年老子祠九龍井涸復涌

昇天檜在亳州西相傳老子乘白鹿緣此樹昇天

重修安徽通志卷五十二

輿地志

古蹟

滁州

建陽故城在州東漢置縣屬九江郡後漢省入全椒輿地紀勝建陽故城在清流縣東四十里

荻港故城在州西北後魏置縣魏書地形志新昌郡領赤湖荻港薄陽頓邱等縣齊周時廢輿地紀勝荻港在清流縣西北二十里即魏故縣方輿紀要州西十里有赤湖州北十里有荻港洲州南十里有薄陽壩皆因故縣而名

蔣家城在州東南五十三里又龔家城在州南四十里又塘堆城在州南三十里三城皆傍湖澤相傳南唐築瓦梁堰以禦北

師水勢橫溢居民築此城以捍水云

三城在州城東輿地紀勝在清流縣東三十里又有雙城在縣東四十里

南譙郡故城在全椒縣西北晉太元中僞置南譙郡併置山桑縣為郡治齊因之梁又置譙州及南譙郡皆治斬在今巢縣界而以此為北譙復又別於渦陽之譙謂之南譙東魏移州治新昌郡而故城遂廢寰宇記梁大同二年割北徐州之新昌南豫州之南譙豫州之北譙凡三郡立為南譙州居桑根山之西今滁州西南八十里全椒縣界南譙故城是也按梁太清二年侯進攻歷陽蓋巢縣之譙時亦有譙州之名景自壽陽襲譙州

阜陵故城在全椒縣東南漢置縣文帝八年封淮南王子安為侯國元狩初屬九江郡後漢永平十六年徙淮陽王延為阜陵

王建初元年改為侯國元和初復為王國後徙晉屬淮南郡後周廢入全椒縣章懷太子曰阜陵故城在全椒縣南寰宇記在縣西南十八里輿地紀勝地名赤土岡高一丈四尺

梁王城在全椒縣東北武山輿地紀勝縣有武山上有梁王城方輿紀要以梁武得名

豐樂城在全椒縣西七十里縣志作六十里梁置縣屬北譙郡隋廢輿地紀勝在艾塘東村傍豐樂院

襄城在全椒縣西襄水經其旁或以為晉時姚襄所築頓邱城在來安縣東橫風村名勝志縣治東一里橫江村有頓邱城

趙王城在來安縣東北二十五里城北有澗澗北有趙侯古冢相傳寇亂時有趙王二將屯此又有丁城在縣東北五十里白

塔鎮東南四面平遠城地高數丈廢置不可考

高塘廢郡在來安縣北梁置高塘郡屬南譙州魏書地形志譙州領高塘郡陳太建五年北伐齊北高塘郡城降隋書地理志清流開皇初廢樂鉅高塘二縣入高塘蓋卽故郡也州志高塘在今縣東北白塔鎮又有古城集在縣北八十里疑卽樂鉅縣遺址

清流廢郡卽今州治晉元帝僑立頓邱郡屬北徐州宋書州郡志頓邱縣江左流寓立元徽初立新昌郡魏收志有譙州梁置治新昌郡其新昌郡領頓邱不改梁置南譙治陳太建七年移譙州鎮新昌郡十一年入於後周隋初郡廢改州曰滁州縣曰新昌十八年又改縣曰清流大業初縣屬江都郡唐武德三年復爲滁州治明初省入州元和郡縣志縣本漢建陽縣地寔宇

記本漢全椒縣地因縣東清流水爲名

全椒舊縣在今縣治東北三十五里虎子澗北漢置縣屬九江郡後漢建武中封馬成爲侯國晉屬淮南郡梁改縣曰北譙陳太建七年分北譙縣置北譙郡領陽平所屬北譙西譙二縣隸入譙州隋開皇時郡廢改縣曰滁水屬滁州大業初改爲全椒縣移治漢故阜陵地明初廢洪武十四年復置元和郡縣志縣在州南五十里晉改南譙梁曰北譙也輿地紀勝有南譙城在縣北二里尹村又有北譙城在縣西北二十五里新高村皆齊梁時故址隋始移今治又縣有臨滁里或謂故郡治

鄼城廢縣在全椒縣西南漢縣也宋書州郡志歷陽領縣鄼漢屬沛晉屬譙流寓立屬南譙郡文帝元嘉八年廢元徽元年又屬平昌郡齊屬臨江郡東魏屬臨徐郡後周廢輿地紀勝鄼縣

在縣西南鄧湖濱舊志其地與和州接壤

嘉平廢縣在全椒縣西南十五里蕭齊置屬南譙郡梁廢

永陽廢縣即今來安縣治本清流縣地唐景龍中析置永陽縣

屬滁州南唐昇元二年改曰來安宋乾道中兵燹戶少時議不

足置縣因改為鎮在今縣東三十里其後郡守因民之請復為

縣寧宇記永陽故城在滁州東北三十五里本漢全椒縣地取

縣北永陽山為名

滁陽監在州西南三里明洪武六年建併置南京行太僕寺於

此有滁陽八監驢騾等十八羣

懷嵩樓在州治後統軍池上一名贊皇樓唐李德裕刺滁州時

建取懷歸嵩洛之意

東壁樓在來安縣東學宮北明萬曆中建鄒元標有記

御書閣在州瑯琊山前宋乾德二年建太平興國中賜額藏四

朝御書

凝香閣在州治取唐韋應物燕寢凝清香之句為名

醉翁亭在州南七里宋僧智仙建歐陽修有記蘇軾有跋州志

明嘉靖中太僕卿趙欽創為樓萬曆中太僕卿沈思孝改為解

醒閣亭後有二賢祠祀修及軾附宋歐陽修醉翁亭記環滁皆

西南諸峯林壑尤美望之蔚然而深秀者瑯琊也山行六七里

漸聞水聲潺潺而瀉出於兩峯之間者醴泉也峯回路轉有亭

翼然臨於泉上者醉翁亭也作亭者誰山之僧曰智仙也名之

者誰太守自謂也太守與客來飲於此飲少輒醉而年又最高

故自號曰醉翁也醉翁之意不在酒而在山水之間也山水之

樂得之心而寓之酒也若夫日出而林霏開雲歸而巖穴暝晦

明變化者山之朝暮也野芳發而幽香佳木秀而繁陰風霜

高潔水落而石出者山間之四時也朝而往暮而歸四時之景

不同而樂亦無窮也至於負歌於塗行者休於樹前者呼後

者應偃偻提攜往來而不至於負者歌於塗行者休於樹前者

肥醲泉為酒泉香而酒冽山肴野蔌雜然而前陳者太守宴也

宴酣之樂非絲非竹射者中弈者勝觥籌交錯起坐而諠譁者

重修安敷道志卷五十二輿地志古蹟

四滁

取賓權也蒼顏白髮頹乎其間太守醉也而已而夕陽在山人
影散亂太守歸而賓客從也樹林陰翳鳴聲上下遊人去而禽
鳥樂也然而禽鳥知山林之樂而不知人之樂人知從太守遊
而樂而不知太守之樂其樂也醉能同其樂醒能述以文者太
守也太守謂誰
廬陵歐陽修也

漸入佳境亭在州醉翁亭北舊名同醉宋宣和中郡守唐恪建

嘉泰中郡守林嶠易名漸入佳境四字至今猶存

豐樂亭在州治西南瑯琊山幽谷泉上宋歐陽修建自為記蘇

軾書刻石又有醒心亭在豐樂亭東山上亦修建曾鞏為記又

有班春亭附歐陽修豐樂亭記修既治滁之明年夏始飲滁水

之近其上豐山聳然而特立下則幽谷窈然而深藏中有清泉
滂然而仰出俯仰左右顧而樂之於是疏泉鑿石闢地以為亭
而與滁人往遊其間滁於五代干戈之際用武之地也昔太祖
皇帝嘗以周師破李景兵十五萬於清流山下生擒其將皇甫
暉姚鳳於滁東門之外遂以平滁修營考其山川按其圖記升
高以望清流之關欲求暉鳳就擒之所而故老皆無在者蓋天
下之平久矣自唐失其政海內分裂豪傑並起而爭所在為敵
國者何可勝數及宋受天命聖人出而四海一嚮之德恃險阻

剗削消磨百年之間漠然徒見山高而水清欲問其事而遺老
蓋矣今滌介於江淮之間舟車商賈四方賓客之所不至民生
不見外事而安於畝畝衣食以樂生送死而執知上之功德休
養生息涵煦於百年之深也修之來此樂其地僻而事簡又愛
其俗之安閒既得斯泉於山谷之間乃日與滁人仰而望山俯
而聽泉投幽芳而蔭喬木風霜冰雪刻露清秀四時之景無不
可愛又幸其民樂其歲物之豐成而喜與予遊也因為本其山
川道其風俗之美使民知所以安此豐年之樂者幸生無事之
時也夫宣上恩德以與民共樂
刺史之事也遂書以名其亭焉

日觀亭望月亭俱在州瑯琊山上明宋濂遊瑯琊山記山中之

亭幾二十所而二亭尤盛

茶仙亭在州瑯琊山明統志宋紹聖中僧永起為州守曾鞏建

取唐杜牧誰知病太守猶得作茶仙之句為名曾鞏有詩又有

無心亭清風亭翠微亭俱在瑯琊山宋晁端受有翠微亭詩

梅亭在州瑯琊山舊有老梅一株為杜默手植

落雁亭在全椒縣西舊名落雁塔

琴臺在州治西瑯琊溪旁唐刺史李幼卿建

望日臺在州西南瑯琊山宋王禹偁有詩

悟經臺在州瑯琊山卽張方平寫二生經處

希真堂在州治州志謂不知其處按宋曾肇十詠詩序云滁城

多草木希真堂列植尤眾

瑞麥堂在州治又有坐嘯堂紫芝堂俱宋建

三隱堂在全椒縣西北元豐九域志桑根山下有三隱山南隱

中隱北隱相去各十餘里皆古隱者所居有泉池石室

東園在州城東隅宋梅執禮序云滁陽舊無郡圃醉翁豐樂皆

在關外獨李紳所勑東園南直瑯琊北通西澗適介守貳宅固

一佳處又有北園宋淳化中孟元喆建王禹偁北樓感事詩序

云郡有北樓通判史公署

張家園輿地紀勝在州西二十里一名天子園俗傳周世宗嘗至此因名

仙槎里在來安縣城東二十里此地最高人望之若仙槎然南唐築瓦梁堰時名此

寶林門在全椒縣寶林橋吳赤烏二年立

瑯琊山寨在州西南十里瑯琊山中宋建炎三年郡守向子俊

因山築壘聚鄉民以拒巨寇李成

焦山寨在全椒縣城外宋焦光贊結寨於此

蔬糧墩在全椒縣西南五十里舊傳伍員伐楚糧匱以米覆土

爲墩若山積然

清流關在州西南二十五里南唐置五代周顯德二年敗唐兵

於正陽唐皇甫暉等自定遠退屯清流關輿地紀勝清流關在

清流縣西三十餘里舊志今其地有中軍帳基又州西北石駝山有北關口卽清流關之北口也

安期洞在全椒縣椒陵山中相傳有安期生遺蹟

飲馬池在州豐山絕頂漢高祖廟側舊傳高祖曾飲馬於此

金甲池在州皇甫山下俗傳皇甫暉嘗屯兵洗甲於此

統軍池亦曰孟家池在州治後宋淳化中孟元喆以龍武統軍知軍事鑿池北園

放生池舊名飲馬池在全椒縣南二百步漢將灌嬰追項羽處

縣志作范增飲馬於此

王母池在來安縣東門外深闊丈餘中甃以甌傍有石刻

眞珠泉在州西南輿地紀勝眞珠泉在清流縣西三十里側菱山遊者撫掌則泉水濺射若跳珠

楚迷溝在全椒縣南二十里輿地紀勝相傳項羽失道處

庶子泉在州瑯琊山唐刺史李幼卿鑿李陽冰有銘篆書爲世

所寶

元公井在全椒縣署前井欄八角刻宋元祐四年十月初吉全

椒令元時忱命開義井於縣門外以資民用今亦稱八角井

柴王井在全椒縣署前元至正時鑿又神山寺石井亦元至正

時鑿深七丈亦傳爲柴王井

琉璃井在來安縣治後泉極甘雖旱不涸以瓦礫投之聲若笙

簧久之乃止

菱溪石在州城東五里本名荇溪避楊行密諱改作菱宋歐陽

修菱溪石記菱溪之石六移去者五其一最大難徙乃以三牛

曳置幽谷附唐李漬荇溪新亭記上臨御明年漬自洛陽令之太守詔牧滁民之三月得古

溪郡之東北十里按地圖志在皇道山之右昔始皇途逕是山因以名焉其下西永陽嶺迤瀉於荇溪此溪是也濬川導廣泉演漾潭島影溢江漢壩中流表平壇四浪混朗雙派委輸襟帶一川斜界千畝無菱苗蘋萍之雜其森練如也有廢亭占勝之地其狀依然也照晴而空水相鮮澄遠而霽山瀉色趨向奇狀不可窮竟訪郡之老長考亭之廢興皆曰三十甲子二周星而不知其所由來矣驗圖籍亦昧其始興之歲也秋七月前河中監察汝南公況前武甯軍殿中隴西公洪州遷客司馬宏農公紹復咸以勝槩為宴之須乃卜於亭是咨是謀遂古創今儉也費不佻乞示無僭也內不重門曠其景也外不崇墉達其望也繇是四海之氣成象不絕春木秀容夏雲奇峯秋天爽空於戲物之廢興時也苟非其時聖人微言矧其蒙者乎時會昌二年正月八日建

秦皇試劍石在全椒縣西北百里舊高城村相傳始皇東巡經此山因以名石

宋紹興十八年進士題名碑在州醉翁亭右梅瑞堂後壁按明道跋云宋登科錄今已不傳此榜以朱文公故特存石刻在滁州之歐梅亭

和州

歷陽故城今州治秦置史記項羽封范增為侯邑漢為九江郡尉治後漢永平中九江盜范容據歷陽為江淮巨患久之始平晉屬淮南郡宋書州郡志晉永興初為歷陽郡治尋入建鄴咸和四年僑立豫州永和九年刺史謝尚鎮歷陽義熙九年割揚州大江以西大雷以北皆屬豫州宋永初二年始割淮東南豫州治歷陽齊建元二年州廢隋為和州治自是州郡皆治此明初縣廢入州元和郡縣志後齊以兩國通和立和州劉禹錫和州志梁王僧辯迎貞陽侯於齊會於此更名和州舊志今州城一名亞父城為范增所築

雍邱故城在州南宋書州郡志本漢陳畱郡屬縣東晉以流寓僑立先屬泰山郡元嘉八年廢屬歷陽郡宋齊因之後周時廢

州志今裕溪河口有雍家城或謂卽雍邱之譌

遏虎城一名遏狐城在州西元和郡縣志歷陽西有遏虎城晉王導築以遏石虎又有卻月城在州南天門山頂劉宋時王元謨築

石跋城在州東北三十里卽石跋鎮方輿紀要宋開禧中州守周虎所築

龍亢故城在含山縣東南漢故縣在今鳳陽府懷遠縣界宋書州郡志歷陽領縣龍亢江左流寓立祥瑞志昇明三年白虎見歷陽龍亢縣新昌村唐書地理志含山析歷陽之故龍亢縣地置寧宇記縣在和州西五十五里本晉龍亢縣後周天和元年併入歷陽唐武德六年改置含山縣以縣境爲眾山所含故名又曰廢龍亢縣在含山縣東南四十里

晉王城在含山縣西北輿地紀勝苻堅侵晉以姚萇爲先鋒晉築城於此以禦之又有姚萇城州志今清溪東有土城數十丈當卽晉王城也其外十餘里有姚萇村

烏江廢縣在州東北本漢東城縣地晉太康中置屬淮南郡永興中改置歷陽郡宋大明七年校獵於歷陽之烏江是也尋割歷陽秦郡置臨江郡永光元年罷齊志復有臨江郡建元二年罷併歷陽後復置治烏江縣魏書地形志烏江縣屬臨徐郡隋書地理志烏江梁置江都郡後齊改齊江郡陳復曰臨江郡周改爲同江郡開皇初郡廢縣屬歷陽郡唐屬和州寧宇記縣在州東北四十里本秦烏江亭晉置縣隋爲烏江郡宋紹興五年廢爲烏江鎮屬歷陽縣七年復爲縣明初省入州今爲烏江鎮穀孰廢縣在州西北本漢梁國屬縣宋書州郡志初屬南梁郡

元徽初改屬新昌郡齊因之梁末廢

鎮淮樓在州治前東阜高臺層構於製最古明太祖駐蹕和陽曾與諸將飲酒賦詩其上

清風樓在州治西南城隈峨嵋墩下宋蔡襄有清風樓詩明統志宋元祐間名連雲觀

水心亭在州治三老堂前唐張籍寄和州劉使君詩送客時過沙口堰看花多上水心亭

犀照亭在州東南十里當利河口北岸晉溫嶠聞水底有音樂之聲然犀照之因以爲名

項亭在州城東四十里烏江鎮東南寔宇記卽烏江亭長艤船處唐李德裕有項王亭賦

丹臺在州大西門外世傳老子煉丹之所

惠政堂在州治廳事西輿地紀勝宋孝宗居青宮時大書惠政堂三字賜守臣胡昉

三老堂在州治後宋元祐間孫賁建祀知州傅堯俞范純仁劉摯

毓麟堂在州東南橫江之濱宋紹興三十一年金主亮入和州臨江築臺誓師渡江晨炊玉麟堂蓋卽毓麟堂之譌

三覺堂輿地紀勝在梁山廣覺院三覺謂賈易龔原及僧冲會

袁天綱宅在州南輿地紀勝在歷陽縣西三十里地名南義許由宅在州西二十里相傳許由所居

張籍宅輿地紀勝在州治通淮門內舊光孝寺又含山縣西五里曰桃花隴又故烏江縣東一里有書堂相傳皆籍讀書處

勒將軍宅在州西北雞籠山李白勒將軍歌序云歷陽壯士勒

將軍名思齊神力出於百夫則天太后召見奇之授游擊將軍賜錦袍玉帶朝野榮之拜橫南將軍大臣慕義結十友燕公張說館陶公郭元振爲首

陋室在州治後唐和州刺史劉禹錫遺趾劉自爲銘

彭祖石室在含山縣南八十里白石山長真觀相傳彭祖飛昇處列仙傳歷陽縣有彭祖仙室州志白石山爲道家二十一洞天名瓊秀長貞之天

東關在含山縣西南七十里濡須隴之北與廬州府巢縣接界三國時爲戍守重地宋史地理志含山縣有東關砦

昭關在含山縣北昭關山史記范雎傳伍子胥囊載而出昭關宋史王德傳紹興十一年德夜拔和州敵退保昭關州志關在州北小峴山西

陰陵在州北八十里陰陵山輿地紀勝在烏江縣西北四十五里俗以爲項羽迷道處

橫江浦在州東南通鑑漢興平元年劉繇遣將樊能屯橫江晉隆安二年桓元與楊佺期進至橫江晉書譙王尚之傳尚之率步卒九千陣於浦上先遣武都太守屯橫江隋開皇九年韓擒虎自橫江宵濟采石元和郡縣志橫江在歷陽縣東南二十六里直江南采石渡處唐李白有橫江詞六首

桑山倉在含山縣西南三十里名勝志秦始皇設倉其上州志宋時亦設雙山寨於此

漁邱渡在州治吳越春秋云伍員過昭關至江漁父乘舟渡之遂至吳今百福寺之東南舊名漁渡

運米徑在含山縣南八十里舊名斗米徑隋末杜伏威將李子

重修安微通志卷五十一
建成棚口於東關下穿渠通黃洛陂入歷陽湖通運令部下人
各齎米一斗就役米盡徑成故名

洗耳池在州城三十五里祁門坊旁有池傳是巢父洗耳處

八卦地在州界河鋪西北壽甯宮內葛仙翁遺蹟也

沸井在州小西門外土街頭關帝廟內晉元帝渡江命郭璞筮
之曰西南郡縣以陽名者井當沸其中興之應未幾歷陽井沸
者三故曰沸井

西街井在州城科甲真才坊下相傳一童子嘗從井中出咸異
之扣其從來曰我本華陽洞中人此井乃其後逕也自是不復
見

平疴湯在州北三十五里寔宇記在州北四十五里此湯能愈
疾故名州志一名香淋泉又名平疴泉溫潔有患瘡疥者浴之

輒愈宋治平中名其地曰平疴鎮

飛錫泉在含山縣南六十里太湖寺昔無用禪師當山腋鑿孔
導泉日取不竭不取不溢僧有真身塔在焉

馬跑泉在含山縣十五里卽昭關泉俗傳伍員過此有馬跑泉
遺蹟宋張浚於昭關築城置水櫃以遏金人卽此泉也

卓刀泉在含山縣西七十五里東關嶺舊傳漢漢壽亭侯卓刀
飲馬於此

廣德州

鄣縣舊城在州治東北九十里秦置漢高帝時改名故鄣

諸葛城在建平縣西十里城隍可容數千人旁有驢城馬城相
去一二里其間有井數十蓋昔人屯駐之地

浮城在建平縣西十里廣數畝其上有木莫能名斧之則血出

地本窪下每夏潦水漲諸圩盡沒此獨巋然若浮故名

郎步鎮今建平縣治後漢光武即位封安城侯子統為建平侯
元豐九域志宋端拱元年以廣德縣郎步鎮置建平縣

石封故縣即今州治陳書梁紹泰元年割故鄣廣德置廣梁郡
永定二年改廣梁為陳留郡隋書地理志宣城郡領綏安縣即

石封改名焉梁末立大梁郡平陳郡廢唐書地理志綏安武德
二年置桃州增置桐陳懷德二縣七年州廢省桐陳懷德入之

改曰廣德元和郡縣志縣西至宣州百六十里後漢分故鄣置
宋為綏安縣大業二年移於今理按劉宋綏安縣在今宜興縣

移泉口廣德廢縣在州東漢故鄣縣地漢末孫吳析置三國吳志呂蒙
傳蒙領廣德長是也晉書桓彝傳自宣城退屯廣德隋書地理

志綏安梁末立大梁郡又改為陳留郡廣德縣屬焉平陳郡廢

省廣德入石封尋改石封為綏安唐至德二載改綏安曰廣德
故城名也自後常為州治明初改縣曰廣陽洪武十三年縣省

通典綏安有廣德城又按大梁即廣梁郡隋志避諱故也
三峰樓在州治前宋紹興中參政李光登三峰樓詩有云一川

花柳擁雕欄濃綠浮空四面山
鼓角樓在州治前宋熙甯初知軍事錢公輔朱壽昌先後建會

輦記
秀遠亭在州治前宋陳天麟有詩

巢雲亭在州南十五里竹山頂疊嶂層巒有松竹泉石之勝其
旁又有摘玉亭

范公亭在州舊司理廳東南宋范仲淹為司理參軍時建北有

雙井亦范所鑿後人思之皆名曰范公亦名義井又有亭曰景范在州治西

春省亭在州治西五里小芝山上明州守朱麟建以勸農

攀蘿亭在州橫山宋天聖中郡守梅詢建

釣魚臺在州治北二十五里唐張志和垂釣處臺下水深莫測

藤蔓繞磯松篁夾岸臺基尚存

解慍臺在州南七十里靈山之巔

嚴公臺在州西唐大順初楊行密將陶雅破孫儒前鋒屯嚴公臺卽此

鳳皇臺在州治北門外州守鍾振築鳳皇墩結臺其上因名

集仙臺在橫山頂一名禮徒臺輿地紀勝在祠山絕頂宋郡守梅詢建

清容堂在州治西宋知軍事錢公輔築臺以居查深訓州人子弟

劉文靖宅在州北三十里今爲唐興寺

眾春園在州治西北玉溪之上州志宋紹興閒參軍趙子濬建

玉溪堂聚景樓圓嶠方壺翠溪三亭前人皆刻石記之元至元

中郡守趙亮夫築亭池上扁曰濯纓明正德中州守喬岱復於

溪上建濯纓橋

暗橋在建平縣東北六十里護形山之麓舊傳伍員奔吳避於

山中追者至此雲氣護之員及橋而天暗遂名

鐘村在州境宋史岳飛傳宋建炎三年飛自宜興駐師鐘村軍

中乏糧將士不敢擾民人至今稱之

紮寨圩在州治西北五里宋岳飛屯兵於此

神仙塘在建平縣南六十里淨覺寺前相傳許真君曾浴此岸有楓樹遇年歉則枝枯年豐則茂豐歉半則六七月始葉

白馬墩在州北三十里舊傳劉文靖於此浴馬

寨墩在建平縣北十里輿地紀勝春秋時伍員伐楚還吳立寨於此舊有寨門遺蹟

鳴鼓墩在建平縣西南二十五里舊傳鄉民築亭墩上每東作時登亭鳴鼓踊躍田功

石鼓墩在建平縣東北六十里石峻嶒狀如魚鱗人行有聲如鼓因名

浴兵池輿地紀勝在州東南三十里東亭湖為張王所開州志廣五百餘畝

不老泉在州城南四十里泉脈流長大旱不涸舊有石碑鐫不

老泉三字

金井在州治兆符門外里許明太祖汲此水以給軍士因名

八角井在高封周舊宅舊傳井有藏金鄉民常欲取之水輒沸涌隱隱聞笙歌之聲又有九曲池亦在宅內皆封周所鑿

郭母古井在建平縣西南三十里俗傳仙人以藥投井水變為醴者即此

桐川舊驛在州西二十里

金牛蹟在建平縣東北十五里相傳昔有神人驅金牛至此為人所見人牛俱沒石上牛蹟尚存

祠山三寶在州西五里祠山廟內一白玉磬篆書宣和舊物也一火珠名軒轅鏡一趙孟頫手疏

一火烈言神輝誠一賦蓋其千施

麻山三頁存快西五里麻山麻內一白王等委書

人祖良人本祖書存本本祖書

金本祖書存本本祖書存本本祖書

金本祖書存本本祖書

金本祖書存本本祖書存本本祖書

金本祖書存本本祖書存本本祖書

金本祖書存本本祖書存本本祖書

金本祖書存本本祖書存本本祖書

金本祖書存本本祖書存本本祖書

本原三卷

